


# BIINÀ BYÀ MÂYÌ BYELÈ MITANTA

 Tusambilaayi. Mukalenge, mpindyewu tudi twitabuuja. Tudi twitabuuja mu Mwânà wa Nzambi, kabidi, ku cyôci eci, tudi twitaba Mwoyi wa Cyendelele kupicila kudiYe. Mpindyewu nyewu tudi badisangishe cyakabidi, mu mapingaja emu, anyi mu diloolo emu, bwa disangisha dikwabo, biikale tuKweyemena bwa Mukenji ne bwa ciWikala mwa kutwambila diloolo edi. Tudi baKwitabuuje, Mukalenge, ne tudi baKwindile Wêwè. Ne Wêwè wâkamba ne: “Aba badi bindila Mukalenge ne bavwijulule bukole bwabo bupyabupya; nebabande muulu ne mapwapwa bu mukanku.” Nenku nyewu tulomba, Nzambi, bwa Wêwè watupa Bukole bwa dibanda naabu abu, diloolo edi, patudi baKwindile apa.

<sup>2</sup> Tudi tuKusakidila bwa bantu aba, ne bwa mushinga ùdìbo naawu kùdì Wêwè ne mushinga ùdìbo naawu kùndì mêmè. Ndi nKusakidila bwa cyôci aci, Taatu. Badi bilengà Byebe. Kabidi ndi ndomba, Nzambi, bwa diloolo edi ne, Wêwè uDimweneshe, kudibo, bilondèshile bidibo naabi dijinga. Kwôkò kwikale mubeedi mwaba ewu, enzaku bwa ondopiibwe. Kwôkò kwikale mpatà mu meeji a muntu, yûmushè, Mukalenge. Nenku utupe anu Bwikadi Bwebe ne mabenesha Ebe, bwalu tudi naabi dijinga, Mukalenge. Wêwè ke dyetu didikumbanyina mu byônsò. Kabidi, katuyi Neebe to, katwena ne citudi mwa kwenza nansha.

<sup>3</sup> Tudi tulomba bwa Wêwè kwakidila masakidila etu bwa byônsò byûdi Wêwè mwenze. Mu Dînà dya Yesu Kilisto ke mutudi tushaala bindile mabenesha Ebe. Amen.

Nudi mwa kusòmbelaayi panshi.

<sup>4</sup> Nenku, ee, kuulu nktalaleku ndambu—ndambu mu diloolo edi dya dyalumingu, munda emu, kupita muvwabi diloolo dya dyalumingu dishaale. Tudi ne kusakidila kwâbûngì kudi bâna beetu badi benze mudimu ne lulamatu lwônsò bwa kubyasa muneemu emu. Ndi mumanye babidi anyi basatu baa kudibo. Mwaneetu Mike Egan, bu mûndì mumone paanyima paapa, ne ndi . . . Mwaneetu Mike, ne Mwaneetu Sothmann, Mwaneetu (ngela meeji) Roy Roberson, ne Mwaneetu Wood, ne bônsò baa kudibo abu, bavwa bapweke kuneeku e kwenza mudimu wa wa kashendende, baditacisha bwa kwasa bintu ebi muneemu bwa twamona mwa kupeta Mukenji ewu mpindyewu, anyi leelu ewu. Pa nanku, tudi ne kusakidila.

<sup>5</sup> Mpindyewu, mu dinda dya dyalumingu dilwalwa edi, bu Mukalenge mwa kwanyisha, ndi muswe kwenza mudimu wa dyondopa wa masambila a babeedi. Nenku netuteeke dituku adi ku mudimu wa dyondopa, bu Mukalenge mwa kwanyisha.

<sup>6</sup> Ngămònu, mu dinda emu ne, kudi mushiki wa mishwala mwaba ewu. Ngăyisambìdidi. Nenku mêmè, panuvwa nwènù nusambila ne nwimba misambu apu, mvwa musambidile mishwala; kadi nyewu kukaadi mikwabo mwaba ewu diloolo edi. Pa nanku, tudi—tudi twitabuuja ne Nzambi udi wondopa babeedi. Kudi majaaniki àbûngì be a dyondopa munkaci mwetu, ne pa buloba bujima, nenku tudi ne kusakidila bwa bwalu ebù.

<sup>7</sup> Nenku mvwa ndyambidila ne, mu dyalumingu dilwalwa edi, bu mudibi ne nêngikalè ne cya kupatuka bwa ntanta mukese, ne bu mutuvwa badifile bikole anu ku dilongesha ne ku Mukenji, mvwa ndyambidila ne neciikale bwalu bwimpè bu twètù mwa kwenza mudimu wa—wa dyondopa, kusambidila babeedi. Nenku tudi ne dyeyemena ne Nzambi neatupe cikondo cya dicyonkomoka.

<sup>8</sup> Mpindyewu, bààbûngì beenu nebiikale ne cya kwendesha mashinyi ntanta wa kilomeeta yàbûngì diloolo edi. Pa nanku mvwa nyiikilangana ne misumba ya bantu kwaka ku—ku Cafétéria kaa Blue Boar, leelu ewu, kûmvwà ndya cyakudya cyanyi cya mundaamuunya. Bantu bimpè be bààbûngì, mêmè kupetaku mushindu wa kubalabula ku cyanza ne kuyiikilangana naabo, bantu bântù nciyiku mwanji kutwilangana naabo kacya kwónsò eku to, biikale balwa mu ekeleeziya emu. Nenku ndi ne kusakidila bwa balunda baa mushindu wawa, ne ndi njinga kusakidila umwe ne umwe wa kunudi. Bamwe baa kudibo mbapoole mbèlèlèbeele, kadi kututwadilayi. Ne mukwabo mmututwadile mbekeci wa mâyi a nsukaadi, anyi byapanshi bya nsukaadi, ngela meeji ne mbyôbì, ne—ne bintu's we. Kanwena bamanye mushinga udi byôbì abi naawu to. Nenku mu dinda kampanda, ndi mwenze anu njuuka mpatuka mu nzubu nunku, misangu mikwabo kudi . . .

<sup>9</sup> Dinda dikwabo kuvwa mwaneetu wa balume mukwabo mwaba awu uvwa mu lutatu lukole be, kayi bilàmbà anyi cinyi to, ukeba bwa mêmè nye kamupetelaku bilàmbà. Ngasa lwendu ne mpatuke, ke mêmè kwamba kutuuta dikàsà ku mbekeci wa mbèlèlèbeele uvwa muteeka mwaba awu. Mêmè ne: “Udi mulwe ne eyi mbèlèlèbeele ngwèwè anyi?”

<sup>10</sup> Ke yêyè ne: “Bwâlà, mêmè ncivwa ne bwalu mu biine abi to. Nkààdi mwaba ewu kacya kumpala kwa bufuku kucyabu, kadi yôyi ayi ikaavwa miteeka anu mwaba ewu pa diine dîbà adi.” Piine apu uvwa m'Mwaneetu mulenga Ruddell uvwa muyintwadile. Nenku, pa nanku, ncyà bushuwa ne ndi nganyisha bintu abi.

<sup>11</sup> Billy Paul wăfumu ku dingambila, katanci aka ne, mu disangisha emu diloolo edi, mbasangishe mulambu, mwine awu bwanyi mêmè. Ndi—ndi nnusakidila bwa ciine aci. Ncivwa mêmè muswe bwa nwènù kucyenza to. Ndi—ndi anu nganyisha didifila dinudi naadi, ne bikwabo, kadi ciine aci kacivwa anu

cikengediibwa to. Nenku, kadi, Mukalenge ānji anubeneshe. Nudi bamanye, nudi bamanye, Bible mmwambe ne: “Munudi benzele ewu udi mutambe bukese wa kudi aba amu, Mémè ngunudi benzele.”

<sup>12</sup> Mpindyewu, mvwa mwakulangane neenu mu mushindu kampanda, pa bidi bitangila Mukenji, ngamba maalu buludi. Nenku ndi. . . Bamwe bantu mbafwanyine kupeta luumvu lwa ne—ne ndi ngela meeji ne Yesu ulwalwa mu dinda anyi diloolo edi. Ke mûndi ngela meeji. Kadi, ncyêna ngamba ne ki cyènzàYe to. Nenku, kabidi, bidi mwa kwikala ne Yèyè abenge kulwa lumungo lulwalwa elu, ne mbifwanyine kwikala cidimu cilwalwa, mbifwanyine kwikala mu bidimu dikumi. Ncyêna mumanye ne Nealwe dîbà kaayi to. Kadi, kudi cintu cimwepele cîndi njinga ku- . . . cinudi misangu yônsò kanuyi mwa kupwaku mwoyi to, ikalaayi badilongolole ku kasunsa kônsò ne ku dîbà dyônsò. Nwamonu anyi? Bwa ne, Yèyè kayi mulwe leelu ewu to, Yèyè mmufwanyine kwikala apa maalaba. Pa nanku ikalaayi anu balame cyôci aci mu meeji enu, bwa ne Yèyè ulwalwa.

<sup>13</sup> Ne ncyêna mumanye ne mpa dîbà kaayi piikala dyanyi dîbà dya ndekeelu pa buloba apa, nansha umwe wetu kî mumanye to. Ne kakwena muntu nansha umwe wa kutudi udi mumanye ne Yèyè nealwe dîbà kaayi to. Kêna nanshà mumanye to, Yèyè mwine, ku Mèyi Ende Yèyè mwine; Yèyè wakamba ne: “Taatu, nkaayende, ke udi mumanye ne Nealwe dîbà kaayi; nansha Mwânà mwine kî mmumanye ne Nealwe dîbà kaayi to.” Mpiikalà Nzambi muMutume cyakabidi kutudi apu. Kadi twètù tudi bindile Dilwa Dyende adi. Nenku Yèyè kayi mulwe mu lukongo lwanyi elu to, m’Mufwanyine kulwa mu lwalonda; Yèyè kayi mulwe mu lwòlò alu to, Nealwe mu lwalonda. Kadi bwanyi mêmè, ncyêna mwa kumona ne kucidi kabidi dîbà dishaale menemene to. Ndi anu. . . Bwanyi mêmè, ndifwanyine kwenzeka mu kasunsa kônsò naka. Kadi, aci kî mbwena kwamba ne. . . Aci kî mbwena kwamba, mpindyewu, ne nenumone mauulu ashintuluka ne byônsò. . . Kî mbwa adi Dilwa bûndi ngamba to. Bûndi mêmè ngamba mbwa Dyambwibwa.

<sup>14</sup> Nwamonu’s, Yèyè udi wenza Dilwa misangu isatu. Mmulwe mu mènà asatu a mwânà. Mmulwe mu busatu: Taatu, Mwânà, Nyuma Mwîmpè. Nwamonu’s, byônsò abi Killisto umweumwe awu, Nzambi umweumwe awu, dîbà dyônsò. Mpindyewu, tudi bamanye ne Yèyè mmulwe bwa kutwala midimu isatu ya ngàsà: dibingishiibwa, dijidiibwa, dibatiiza dya Nyuma Mwîmpè. Byônsò, mu Nzambi, bidi bikumbajiibwa mu isatu.

<sup>15</sup> Pa nanku Yèyè wawalwa, musangu wa kumpala, bwa kupikula Mukaji Musela Wende. Udi ulwa, musangu mwibidi, bu Dyambwibwa, bwa kwangata Mukaji-musela Wende kuya nende. Udi ulwa, musangu mwisâtù, mwikale ne Mukaji-musela Wende, Mfumu ne Mukalenge-mukaji; paanyima, ke pòpò apu padi bantu bààbûngi bindila Dilwa adi.

Kadi paalwaYe ewu musangu, anu aba badi badilongolole ke baamanya paalwaYe. Nekwikale anu bantu kabaciyiku to. Bantu kabaakumanya ne cidi cibènzèkèle ncinyi to. Nebiikale anu babàngàte baye naabo, mu katanci, mu mushindu wa biikale anu bapangike cyanaana. “Bashintuluke mu katanci, mu mupodi wa dísù.” Pa nanku ikalaayi anu badilongolole ku cyôci aci. Ncifwanyine kwikala cyenza bwôwà mu dinda kampanda bwa kumona ne munanga webe kampanda mmupangike, muntu nansha umwe kacyi mwa kumupeta. Kí mbifwanyineku kwikala bya mwadi pa kumanya ne bwalu abu bukaadi bupite kadi wêwè mubupangile anyi? Pa nanku shaalaayi anu kumpala kwa Nzambi.

<sup>16</sup> Mpindyewu, lumingu lulwalwa elu, bu Mukalenge bwa kwanyisha, mu dimwe dyalwa, lumingu lwa paanyima paa elu lumingu lwa mu dimwe, bu Nzambi mwa kwanyisha, nêmpatukè ne famiye mbapingaje ku Arizona kuyaayabo mu tulaasa, pashiishe mêmè—mêmè nêmpinganè.

<sup>17</sup> Mpindyewu, ncyèna mpatuka nya kuntwaku. . . Ncyèna ne masangisha kampanda a kwikalamu kuntwaku to. Mêmè ncutuku nnenga mu Arizona menemene to. Ntu anu muye myaba mikwabu. Ndi nkafila mukajaanyi kuntwaku, mu dimwe dilwalwa edi. Nêmpinganè cyakabidi apa. Nêngùmukilè apa bwa kuya mu Colombie Britannique. Nêmpinganyinè mu Colorado. Nêngikalè cyakabidi mu Arizona kakese pabwîpi ne Noël, anu bwa tusunsa tukese cyanaana, ntanta mukumbane bwa. . . pàmwăpa matuku abidi anyi asatu, kukungwija famiye, kupingana apa mu matuku a diikisha dya Noël, bu Mukalenge mwa kwanyisha, kwenza disangisha munda mwa lumingu lwa cidimu cipyacipya alu mwaba ewu.

<sup>18</sup> Pa nanku mêmè ntu apa, misangu kana yônsò, mipite bûngi. Ntu apa misangu dikumi kupita kwaka naka, bwalu katwena ne ekeleeziya anyi ne masangisha kwôkù aku to, katwena ne cintu nansha cimwe kuntwaku to, nenku, cintu cya ne ndisangisha dya ekeleeziya. Ke cintu cimwe cya cibi ncyaci pa bwalu abu. Ncyèna ne mwaba wa kwikala kutuma bânà bwa kuteelejabo Mayiisha aa to, mushindu udi beenu bânà bafikaku ku diâtèèleja mwaba ewu emu, nenku—nenku ke cintu cimwe cidi citupangike ncyaci. Kadi bônsò badi ne mubidi mutambe kwikala tumatuma. Kuulu nkûme, luuya lukole, kûme cyoncyoncyo, kadi bânà bônsò badi bamweka ne mubidi mutambe kwikala tumatuma. Mêmè ncutu nkwenza ntanta bule bukumbane bwa kumanya ne nkulenga anyi kî nkulenga bwa bukole bwanyi bwa mubidi to. Mêmè, ntu anu mu ditambakana, ne ngee—ngee—ngeela meeji ne batu bandele bwa kwikala anu mulalakanyi.

<sup>19</sup> Mukajaanyi utu munginyike ne. . . Ndi mumanye ne yêyè udi kaaba aka, nenku nêmpetè bwalu ebu paanyima paa disangisha, munudi bamanye nwênù bônsò. Batu babiikila cintu aci ne ncinyi, mpeepele myendakanyi, anyi mpeepele idi

kayiyi diikisha, anyi nî ncinyi—nî ncinyi apa, nudi bamanye, lusenga lwa lunteka? Anyi, mêmè ntu anu mu ditambakana misangu yônsò, mu ngakwilu mukwabo. Ne nkaadi muselangane mpindyewu, kukaadi bidimu makumi abidi ne bibidi, kadi mêmè, misangu mikwabo, ntu ndyambidila ne ndi mwenyi kumbelu, bwalu bidi bikengela anu kwikala kuya.

Kadi ndi mwindile cikondo citwikala basòmbèle panshi mu Ditunga dya kwetu dîngà dituku. Kadi bwa mpindyewu mvita icidi anu mimonangane, pa nanku twikalaayi anu mu disambila.

<sup>20</sup> Kanupu mwoyi to, dinda dya dyalumingu dilwalwa, bu Mukalenge mwa kwanyisha, nulwayi ne babeedi beenu ne beena ntatu. Nulwayi kumpala kwa dîbà, nusombe, ne pamwâpa kudi musumba wa bantu badi bakengela kusambidila. Nebikengele twêtù kwabanya twarta twa disambila. Kwôkù kakùyi bantu bûngì bukumbane to, katwakwabanya twarta twa disambila to, kwôkù anu ndambu mukumbane bwa twêtù kwenza mulongo mukese wa bantu bu makumi abidi anyi makumi asatu, anyi cintu cya bu nanku awu. Kadi netwikale—netwikale pamwâpa ne cya kwabanya twarta twa disambila, nenku pâmwâpa netwikale ne cya kucyenza bu dîbà dijima nanku awu kumpala kwa disangisha dyena diinà, cîndi ncinka ne necyangate... Neciikale pa dîbà mwandamukulu, dîbà mwandamukulu anyi dîbà mwandamukulu ne tusunsa makumi asatu, mwabanyabo twarta twa disambila; kukangula ekeleeziya, kwabanya twarta twa disambila mu dinda dya dyalumingu dilwalwa edi. Nenku pashiishe nwikale batwishiibwe bwa kwikala apa bwa beenu... Nulwe ne bananga beenu, nubabweje munda emu. Munda mwa ekeleeziya nemwikale mwîmpè ne mutalale, piikalabo basaama, nenku netwènzè ne mwetu mwônsò mutudi naamu bwa kubasambidila.

<sup>21</sup> Twasakidilaayi, cyakabidi, bwa mulambu wa dinanga.

<sup>22</sup> Nenku mpindyewu netubale ndambu wa Dîyi dya Nzambi, diloolo edi, ne netudilongolole cyakabidi ku dilwa edi dya Bwikadi Bwende bwa kututwadila Dîyi Dyende. Mpindyewu, tudi bamanye ne twêtù tudi mwa kubala bidi bifunda, kadi bidi bikengela bwa Nzambi abuulule dyumvwija. Nwamonu anyi? Twêtù tudi mwa kwangata bidi bifunda, kadi bidi bikengela bwa Nzambi abuulule dyumvwija. Nenku panudi nubuulula mpindyewu mu Mukanda wa Yelemiya apu, mu nshapita 2... .

<sup>23</sup> Ndi njinga kwamba ne ndi ne disanka dya kwikala, pamwe neetu, ne Mwaneetu Lee Vayle, mwaneetu mwa mushinga mukole mu Mukalenge. Ne ndi ngela meeji mwaba ewu, mwaneetu ewu, ncyèna mwa kuvuluka dîna dyende to, Mwaneetu Willard Crase. Kabidi ngâmònu bânà beetu baa ku Arkansas, Mwaneetu John ne bakwabo, bafumine mu nyungulukilu wa Poplar Bluff, ne Mwaneetu Blair. Ne, kaa, Mwaneetu Jackson, ne Mwaneetu Ruddell, ne bàabûngì bândi

nciyi—nciyi mwa. . . Mvwa mwa kujinga kuteela muntu ne muntu mu dínà, kadi ncyéna anu ne mushindu wa kucyenza to, nenku nudi anu nuumvwa. Mwaneetu Ben Bryant, nyewu mmumona musòmbe mwaba ewu; yèyè ke utu dyanyi ditumba dya ma-amen pântù. . . Bantu bônso batu bamanye Ben ku dîyi dyende. Uh-huh.

<sup>24</sup> Twètù, basòmbe mu Californie musangu kampanda, mvwa nyiisha Diyiisha kampanda bwa ba-Baptistes mwamwa mu cibandabanda. Bavwamu ne ntenta munene, ne ba-Baptistes bààbûngì baa cipidi citumbuke. Nciyiku mwa kuumwa “amen” wetu ewu ufumina mwaba nansha umwe to; nudi bamanye’s, baciina ne bamwe baa ku bakaji mbafwanyine kubomboloja bilaabu bivwa kwîsù kwabo. Ke pashiishe, katanci aka anyi, mêmè kumona makàsà abidi muulu bu *apa*, abanda muulu mu lupepele, ne byanza binene bibidi, ne nsuki mifiike inyungakana kwaka, wela lubila ne: “Amen,” wela lubila mushindu awu. Ke mêmè kutangija mèsù panshi, mêmè ne: “Ben, kuwáfûminyî nkwèpi nanku?” Yèyè ke uvwa utwa “amen” wa cikunda awu.

<sup>25</sup> Nyawu mmona mukajende wanji kumujoja, ndambu. Ee, nyewu ukaadi wenda ujimija miine nsuki mifiike ayi, kadi aci cidi anu cikumbane, nudi bamanye. Kuditacishi bwa ciine aci to. Mêmè, nkaadi mujimije yaanyi, kukaadi ntanta mule.

Pa nanku, mpindyewu, kanupu mwoyi bwa kusambila.

<sup>26</sup> Mpindyewu patukaadi tuya ku luseke lwa disangisha ludi lukengela meeji matooke apa, vulukaayi ne, twètù babale Dîyi edi, nenku Nzambi neabeneshe Dîyi Dyende. “Kadyakupingana kudiYe patupu to, kadi neDikumbaje kiipacila kâdibo baDitumine.” Ne ndi mumanye ne, mu kubala kwa Dîyi, nêngikalè misangu yônso anu mu bulelela. Pândi mbala Dîyi, Nzambi neatwe Dîyi Dyende mushinga.

<sup>27</sup> Mpindyewu tujuukilaayi kuulu bwa kupa Dîyi Dyende kaneemu. Yelemiya, nshapita 2, mvensa wa 12 ne wa 13 ya Yelemiya 2.

*Kemaayi, Nwênù. . . maulu, bwa bwalu ebû, kwacikaayi bwôwà bukole, ikalaayi batekete mu maboko, mudi MUKALENGE wamba.*

*Bwalu bantu baanyi mbenze mibi ibidi; mbandekele mêmè mpokolo wa mâyi a mwoyi, ne mbakadyûmbwile biinà bya mâyi, biinà bya mâyi byelè mitanta, bidi kabiyi mwa. . . mwa kulamaku mâyi to.*

Twinyikaayi mitu yetu mpindyewu.

<sup>28</sup> Nzambi munanga, Dîyi Dyebe dyamanyi kubadiibwa. Nenku tudi tulomba bwa Wèwè utwe Dîyi adi mushinga, ne utupe diloolo edi lusumwinu anyi cintu cifwanangane naadi Dyôdi; patudi tutangila ku matuku akaadi mapite, Izaleela, bbu

bileejilu, bu mudi Bible utulongesha ne tudi mwa kumona cyûvwà Wêwè ubenzela pavwabo batumikila Dîyî, kumona cyûvwà Wêwè ubenzela pavwabo bashikukila Dîyî, bwa twêtù kuyiila citudi ne cya kwenza. Pa nanku, tudi tulomba bwa Wêwè kwakula neetu diloolo edi mu mushindu wa pabwawu menemene, bwa twamona mwa kumanya mushindu wa twêtù kuditwala mu dituku edi, ditwayiidi mu dinda emu ne ke mutudi ne mwoyi emu. Bwalu tudi tulomba nanku mu Dînà dya Yesu. Amen.

Nudi mwa kusòmbaayi.

<sup>29</sup> Ndi njinga kwakula diloolo edi pa cyena bwalu eci, ka—katanci kîpî cyanaana: *Biinà Byà Mâyì Byelè Mitanta*.

<sup>30</sup> Izaleela uvwa mwenze mibi minene ibidi. Nzambi mmwambe ne bavwa baMwele nyima, Yêyè Mpokolo wa Mwoyi, ne bakaavwa badyũmbwile biinà bya mâyî bwa kwikala kunwamu. Mpindyewu, aci ncishindaayi.

<sup>31</sup> Cîndî mwelele meeji ku mufundu ewu mbwalu ncifwanyine kwikala cintu cifwanangane ne cîmvwà ngamba mu dinda emu, cya dîbà ditudi ne mwoyi, ne Kabingila katudi tusbakeena.

<sup>32</sup> Nenku tudi tutangila Izaleela bu cileejilu, cya ne, civwa Nzambi wikalangana aci, bikengela Yêyè ashaale umweumwe awu. Ne kûdi cintu anu cimwepele civwa Nzambi utwa mushinga, civwa, njila Wende uvwaYe mulongolwele bantu. Nenku pavwabo bapatuka mu njila awu, nenku Nzambi uvwa ufwishîbwa bundu, nenku Nzambi uvwa upicishila bantu mu dikenga bwalu bavwa bapatuke mu civwaYe mubâmbile bwa kwenzabo, nansha bwalu bwikale cinyi.

KubapaYe mene ne mukenji ne: “Kulengi, kukwaci, kulabulu.” Kabiyi anu bwa bubi bwa kwenza cyôci aci to, kadi bubi bwa kushikukila civwaYe mwambe bwa kwenzabo. Nenku misangu yônsò kakutu kwanji kwikala mukenji kakuyi dinyooka bwa mukenji awu to. Bwalu, kwôkò kakuyi dinyooka to, dîbà adi, mukenji kawena menemene ne bukole to anu mwikale ne cibawu. Mukenji!

<sup>33</sup> Mpindyewu, tudi tusangana ne, cyakenzabo mu dituku adi ncimweke ciikale cifwanangane ne citudi twenza leelu ewu, cidi bantu beena ekeleeziya munkaci mwa kwenza.

<sup>34</sup> Mpindyewu tudi tumona cintu cya pabwaci mwaba ewu. Ncifwanyine kwikala cya pabwaci kudi bamwe bantu, paakambaYe ne: “Nwênù, bôbò, mbadyũmbwile biinà bya mâyî, biinà bya mâyî byelè mitanta.” Mpindyewu, pâmwâpa bamwe baa kunudi kabatu bamanye ne ciinà cya mâyî ncinyi to. Mbanganyi badi bamanye ne ciinà cya mâyî ncikampanda? Ee, cibwîpî ne bônsò baa kunudi. Bu wêwè mukoleleku mu ferme, udi mumanye ne ciinà cya mâyî ncinyi. Ndi mvuluka ne nkaadi munwanwanwe bishiishi bûngi cyanaana bya mu ciinà cya mâyî,

mu—mu mushindu wa ne ndi mumanye bîmpè cì—cìdì ciina cya mâyi.

Nkààdi muyiisheyiishe mu misoko ya ku ncyama, mu kaacitanda kaa mici milambileku, mûvwà mwa kwikala ne mbidika munene mûle tente ne mâyi a ciinà muteeka mwaba awu, masuna a—a mvula, nudi bamanye, nenku àkaavwa menze matuku ndambu. Nenku—nenku bîshiishì, mèbà a bufuku awu, bivwa mwa kubwelamu. Pa nanku mêmè ndi mumanye cidi mâyi a mu ciinà.

<sup>35</sup> Cii—ciinà mmwa—mmwaba, ncintu cyumbula mu buloba, bwa kwangata mwaba wa mushimi. Mwaba udi bantu kabayi ne mushimi to, nenku badi benza cii—ciinà cya mâyi. Mu ngakwilu mukwabo, ciinà cya mâyi nntanki mwenza kudi bantu, anyi mushimi mwenza kudi bantu mu buloba, udi muntu muumbule, bwa kukelekeje mâyi, bwa—bwa kwenza naawu mudimu. Bamwe bantu batu bàòwa pambidi, ne bakwabo benza naawu mudimu bu mâyi a kunwa, ne a mishindu mishiileshiilangane, pàmwăpa. Mâyi ônsò misangu mikwabo, atuvwa tupeta pa ciibidilu, avwa a mu ciinà. Tuvwa ne ciibidilu cya kwikala ne cilumyana aci cya kale civwa cikengela kunyungulula, kunyungulula, kunyungulula, kunyungulula, bwa kubandisha mâyi; kuvwa tumbekeci tukese tuswikilaku, bwa kupatwilaku mâyi mu ciinà ne mpompi.

<sup>36</sup> Ee, tudi tumona cintu cimwe cidi cifila dishiilangana pankaci paa ciinà cya mâyi ne mushimi. Mpindyewu, ciinà cya mâyi cidi mwa kushaala munda mutupu. Cii—cii—ciinà kaciyena mwa kudyuwila nkaayaaci to. Cidi—cidi. . . Kaciyena cya dyeyemena to. Kwêna mwa kweyemena ciinà cya mâyi to. Cidi cyôci ne cya kweyemena ne kulaala anu ku mvula idi imata mu movù wa luuya anyi mu movù wa mashika, cyônsò cidiku aci bwa. . . Pa ciibidilu, mu cikondo cya movù wa mashika padi nèjè ne mvula bimata, dîbà adi bidi bitwala mâyi mu ciinà amu. Nenku cyôci kaciyi cipete mâyi awu to, nenku kanwena—kanwena nupetaku mâyi to. Ônsò akaadi—ônsò akaadi. . . adi uuma. Nenku kaciyena mwa kudyuwila kabidi nkaayaaci to. Ciinà cya kale aci kaciyena mwa kudyuwila kabidi nkaayaaci to. Cidi cyula ku—ku mâyi a mvula adi apwekamu.

<sup>37</sup> Nenku ndi njinga bwa numone cikwabo cintu pa bidi bitangila ciinà cya mâyi. Pa ciibidilu, udi usangana, anyi mushindu uvwabi kwetu kumbelu, ciinà cya mâyi. . . Pa ciibidilu diyeeba ditu dinene kupita nzubu misangu mitwe nansha ku ibidi, nenku batu pa ciibidilu bakelekeje mâyi ku diyeeba aku, aya too ne ku ciinà aci. Ndi mvuluka bîmpè ciinà cya mâyi cya kale kuntu kwaka, pavwaye. . . pavwa mi—mikelekeje ibwejamu mâyi, yôyi paayi, afumina ku diyeeba. Cidi cyula ne mâyi a ku diyeeba.



Pa nanku mâyi mmakelekeja afumina ku musaka wa diyeeba; kuvwa, nyama yônsò iwwa inyungulukila mu bulà bwa cikumbi amu, ne bukooya bwônsò bwa mu bulà bwa diyeeba mbusòmbe kuulu kwa diyeeba aku, mu bikondo bya mushipu. Nenku mâyi adi alwa abibomboloja byônsò ku musaka aku, abibweja mu cinwinu cyenza kudi muntu, pashiishe mu kaamulonda kenza kudi muntu, pashiishe mu ciinà cya mâyi cyenza kudi muntu. Nenku panwikala kanuyi ne bukooya, ncyêna mumanye cinudi naaci to, panudi ne ciinà cya mâyi. Eyowa's, mukalenge! Byônsò mbyenza kudi muntu, biine abi ne bukooya bwebe bwa nkooyòlola.

<sup>38</sup> Nudi bamanye, tuvwa ne ciibidilu cya kubiikila. . . Tuvwa ne mukusu wa kutaata naawu muswikilaku. Nutuku bamanye ne civwa ncinyi ciine aci? Tuvwa ne ciibidilu cya kuteekapu mukusu wa kutaata naawu, bwa kukwata bìshiishì ne bintu byônsò bidi bifumina ku musonga wa di—diyeeba aku, ne ku nyungulukilu yônsò wa mwaba awu, biàpòngòlòle kuùmusha emu kuàtùma mwaba mukwabo, akabwela mu ciinà cya mâyi amu. Nenku tuvwa ne ciibidilu cya kuteekapu mukusu wa kutaata naawu, bwa kukwata byônsò bi—bitatutatu ne bintu bituvwa mwa kukwata abi. Mu bushuwa bwa bwalu, aci kacivwa mwa kukwata manyaanu meena diinà to, civwa cikwata anu bintu bya binene bivwa bipweka bikaponenamu abi. Cìshiishì civwa cifwanyine kukwacikamu, kadi musonji wa cìshiishì awu uvwa utungunuka upita ne mâyi. Pa nanku, nuvwa—nuvwa anu ne bukooya bwetu bwa bushuwa ebu panuvwa ne ciinà cya manyaanu cya kale.

<sup>39</sup> Mu matuku makese, nulekela mâyi awu miimane mwaba awu, nenku ashaala matengebele. Panudi nulekela mâyi miimane mu ciinà, adi ashaala matengebele. Nenku adi ashaala mùle tente ne—ne ndimba, ne misodya, ne nyoka. Nenku tuvwa ne ciibidilu cya kubibiikila ne “tuubivuba,” tukese menemene. . . Ncyêna mumanye ne. . . Kì nkìshi to, tùtu. . . Ncyêna mpeta mushindu wa, ncyêna mumanye munutu nwênù bafwanyine kutubiikila to. Kadi kantu kakese kampanda kabwela mu mâyi awu, tu—tutuvwa twètù tubiikila ne ntuubivuba. Nutu bamanye ciditu. Mbanganyi badi bamanye bìndì ngamba abi? Kaa, mona's, cya bushuwa, nwênù bônsò beena ku misoko nudi bamanye. Biàvwija ônsò matengebele, ne pashiishe ebi bitu binange ditengebela dya mâyi abi bilwa naadi. Bidi anu bilwa cya bushuwa, bwalu mmashaale matengebele. Ne bu mudiwu matengebele, adi akoka nyama utu pende munange mâyi matengebele awu.

<sup>40</sup> Nenku aci's ncifwanangane bikole menemene ne ekeleeziya yetu eyi leelu. Ngela meeji ne twàlekèdì. . . Umwe wa ku mpekaatu minene idi ekeleeziya mwenze leelu ewu, anu bu Izaleela menemene mu cikondo aci, mmiMulekele Yèyè, Mpokolo wa Mâyi adi ne mwoyi, kadi midyùmbwile biinà bya mâyi

byenza kudi bantu. Nenku ikaadi mishaaale cisòmbedi cya cintu cyònsò cidi cinange mâyi a mushindu awu. Misodya, ndimba, ne mishindu yònsò ya twîshî twa bukooya, mbisòmbèlemù, bwalu nntanki mwenza kudi muntu. Nenku mu ntanki emu mmudi bintu ebi bisòmbela, cileejiilu cipwangane cya mangumba etu leelu ewu.

<sup>41</sup> “Mpindyewu,” mùdì wamba, “Mwaneetu Branham, bwa cinyi wèwè utu utuuta bantu abu bisùsù bikole nanku awu?”

Bivwa anu bikengela kucituuta. Bivwa anu bikengela kucituuta. Cinyeemaayi, bwalu ndekeelu wa byònsò necyènzè cimanyinu cya nyama wa lwonji. Vulukaayi ne, aci m’Bulelela! Neciikale cimanyinu cya nyama wa lwonji. Dingumba ke dyalobola buludi too ne ku cyòci aci. Didi mu njila ditangileku patudi twakulangana apa, bwa kwenzelijangana ku bukole, ne bukole kampanda.

<sup>42</sup> Tangilaayi mu bukalenge bwalabale bwa kale bwa cyena Loomo. Ncyòci aci menemene cyakabalombola too ne ku cimanyinu cya dipambuka. Nutu bajandule ne muntu nansha umwe kavwa mwa kusumba anyi kusumbisha pavwaye kayi ne cimanyinu cya nyama wa lwonji. Bivwa bikengela anu yèyè mwikale naaci.

<sup>43</sup> Kudi bantu mishindu anu ibidi bìikalà pa buloba: aba biikala ne Citampi cya Nzambi, ne aba biikala ne cimanyinu cya nyama wa lwonji. Mishindu anu ibidi, pa nanku nebikengele wikale anyi ne eci anyi ne cikwabo. Neciikale dipambuka, ci—cimanyinu cya—cya ntendeleelu, ntendeleelu mupambuke.

<sup>44</sup> Nenku neikale ne cimfwanyi cya nyama wa lwonji. Patudi tulonga, tudi tujandula ne Loomo ke uvwa, udi, ne wíkala misangu yònsò, cimany- . . . anyi, nyama wa lwonji. Menemene. Kamwena mushindu wa kucyumvwa mushindu mukwabo nansha. Loomo!

<sup>45</sup> Nenku Loomo wakenza cinyi? Wakandamuka kuumuka ku Loomo wa cimpanganu kushaala Loomo wa ci-paapà, ne wakalongolola ndongolwelu, ndongolwelu wa buloba bujima, uvwa wenzēja bantu bònsò bwa kuyabo ku ntendeleelu umwepele awu anyi kushipiibwabo.

<sup>46</sup> Nenku’s ncintu cya cikemesha padi États-Unis ewu umweneka mu cyalu, nenku mwikale mufwanangane ne mwânà wa mukooko. Ne mwânà wa mukooko pende udi ne tusengu tukese tubidi, bukenji bwa cyena mbulamataadi ne bwa cyena ntendeleelu. Ke paanyima pa cikondo kampanda, pakaavwa aci mwânà wa mukooko, twètù kujandula ne wakaakula bu dragon ne wakakwata mudimu ne bukookeshi bwònsò buvwa naabo dragon kumpala kwende. Ne Bible udi utwambila ne baakamba ne: “Twènzàayi cimfwanyi cya nyama wa lwonji.” Cimfwanyi ncintu cifwanangane ne cintu cikwabo cya cyanaana. Nenku tudi mwa kumona bwalu abu anu mpindyewu mene ne, mu

ngiikadilu wende wa bupambuke awu, ekeleeziya nyêyè ewu munkaci mwa dyanza Nsangilu wa Maeeleeziya wa Buloba bujima, udi mwikale cimfwanyi cya bukookeshi bwa Loomo; ne neenzejè bantu ku bukole cintu cimwecimwe cyakenzejangana Loomo wa cimpanganu. . . anyi Loomo wa ci-paapà. Pa nanku, kakwena mushindu mukwabo nansha, kakwena cintu cikwabo to. Kadi aci ke Bulelela!

<sup>47</sup> Nanku ke bwalu kaayi ndi nciutuuta bisûsù mu cyanyi cikondo, mu aanyi matuku, bwalu bidi bikengela anu kucituuta bisûsù. Dibikila kulwadi, dya ne: “Patukaayi munkaci mwende, nwênù bantu Baanyi, bwa kanwikadi nwâlwa kwikala baabanyanganyi baa mpekaatu yende!”

<sup>48</sup> Mpindyewu, mêmè ndi mfwanyikija cyôci aci ne biinà bya mâyi bya manyaanu, bya bukooya ebi. “Yêyè ke Mpokolo wa Mwoyi. Yêyè ke Mâyi adi ne mwoyi.” Kadi bantu badi bashiya Aci baya kadyumbwila biinà bidi mwa kukwata anu bukooya. Aci ke cintu cimwepele cidici mwa kukwata. Ke cidi cyena mangumba cyenza; cidi cikwata cintu cyônsò cidi cilwa ciikale cijinga kudilamikaku. Mbaswe kucyakidila mwômò amu padici ne mfranga, anyi mwa kwikala ne mvwadilu wa mushindu kampanda. Nansha bôbô biikale banganyi, nansha bafumina penyî, badi anu babangata, nansha bishi.

<sup>49</sup> Mpindyewu nyewu tusangana, kabidi, ne, cimanyinu cya nyama wa lwonji cyakenjiibwa mwaba ewu aci. . . Amerike udi nomba wa dikumi ne isatu. Wakalediibwa ne matunga makeke dikumi ne asatu. Uvwa ne dibendela diikale ne mitooto dikumi ne isatu, tushoonyi dikumi ne tusatu. Mwine awu mwikale upatuka ne mu Bwakabuulwibwa nshapita wa 13. Ne Amerike mwine utu misangu yônsò anu mukaji, muleejiibwe pa binjanja byetu bya mfranga. Nansha mutu wa Indien, pa cinjanja cya centime, nduseke lwa mpala wa muntu mukaji. Tutu bamanye aci, bamanye bwalu bulonda bwa cyôci aci. Byônsò, Ngonga wa Budishikaminyi, ne bintu bikwabo byônsò, budishikaminyi. . . Lupingu lwa Budishikaminyi, byônsò, bidi anu muntu mukaji. Mukaji; nomba dikumi ne isatu. Nwamonu anyi? Mpindyewu, bidi—bidi bilenga be bwa kumona bintu abi.

<sup>50</sup> Nanku mpindyewu ndi mudyanjile kwamba ku dibuulula dya kudi Nzambi, anyi cikeena-kumona cya mu 1933, ne bintu mwandamutekete nebyenzeke kumpala kwa cikondo cya kunshikidilu. Nanku biine abi, cimwe cya ku byôbi, civwa ne: “Mussolini, yêyè mene uvwa wenda ushaala mfumu wa cimbambila, neashaale mfumu wa cimbambila; ne, kabidi neabucikilangane ne neapweke too ne mu Êthiopie, ne neakwate Êthiopie; ke Nyuma, kwambaYe ne: ‘neadishinde ku makàsà ende.’”

<sup>51</sup> Ndi ndikonka ne nkushaaleku nansha umwe wa ku bantu baa kale baa mu tabernacle emu, udi muvuluke ne

mémè ngákamba nanku awu mu Redman's Hall kwinsi eku patwakayiisha, kukaadi bidimu byabúngì, byabúngì menemene. Kudiku nansha umwe mu nzubu emu, diloolo edi, udi mushaale wa ku bavwa kuntu kwaka ku Redman's Hall, pángààkayishà cyòcì aci, paakapatulabo N.R.A., mu cikondo cya cipungu cya kumpala cya bukalinge bwa Roosevelt? Ngela meeji ne kakwena muntu nansha umwe munda emu to. Kudiku nansha umwe anyi? Eyo, eyo, umwepele, udiku umwepele. Eyo, Mandamu Wilson, ndi mumuvuluke. Mukajaanyi, musómbe paanyima paapa. Babidi mbadi bashaale, pa lukongo lujima lwa kale lwa bóbò abu mu dituku adi.

Ne, paakambabo ne N.R.A. ewu ne ke uvwa cimanyinu cya nyama wa lwonji, mémè kwamba ne: “Kantu nansha kamwe kí nkatangile aci to; nansha kakese. Cimanyinu cya nyama wa lwonji kaciyena cilwila muneemu to. Cidi cipatukila mu Loomo. Nenku aci kaciyenaku mwa kwikala cimanyinu cya nyama wa lwonji to.”

<sup>52</sup> Nenku mpindyewu nuvuluke ne bintu ebi byakambiibwa. Ngákamba ne: “Adolph Hitler neafike ku ndekeelu wa kayi uumvwika to. Ne yèyè neabunde États-Unis mvita. Ne bavwa balwa kwasa cintu cinene—ci—cinene cya nshààmendà, ne bavwa mene mwa kusòmbelamu. Ne anu mwine amu beena Amerike bavwa batuucikamu byenze ne bwòwà, ku cyòcì eci.” Nenku civwa lumbu lwa Siegfried line, bidimu dikumi ne cimwe kumpala kwa lwòlò kubanga kwibakiibwalu. Ke pashiishe mémè kwamba ne: “Kadi uvwa ukafika ku ndekeelu wende; nenku États-Unis neacimune mvita ayi.”

<sup>53</sup> Nenku pashiishe kwamba, ne: “Kudi tusumbu tusatu: Nazisme, fascisme, ne communisme.” Nenku mémè kwamba ne: “Twònsò netukajikile mu communisme. Russie neangate twònsò atu, mu communisme.”

<sup>54</sup> Ke mémè kwamba ne: “Pashiishe maalu a mamanya neashaale manene menemene, muntu neikale ne meeji matambe kutwa, mu mushindu wa wenza bintu byabúngì too ne ku dyenza dya mashinyi miikale ne mmwenekelu wa diyi, ikala ne cintu bu lumwenu lwa kuulu kwawu aku, ne neikale makontonona kudi bukole bukwabo kampanda kaciyi yèndà to.” Kadi's bakaadi bapete mashinyi miine awu.

<sup>55</sup> Ke mémè kwamba ne: “Pashiishe nsòmbelu wa bakaji beetu neapweke mu mushindu wa bintu bya ciipanshi, mu mushindu wa ne nebiikale cintu cya bundu be kudi matunga ónsò. Nebavwale bilàmbà bya balume. Nebatungunuke ne kwenda kuumusha byabo bilàmbà too ne mu bushuwa bwa bwalu paayabo kafika ku dipweka dya milongo byenze bu bavwale bilàmbà bya mwinshi, kwajiki. Nenku, kumana kumana, nebakafike too ne ku divwala anu dibeki dyetu dya mfigi edi.”

Nenku nwênù baswe kumona, mu cikandakanda cya *Life* cya ngondo washaadi ewu, bavwa bapatule mukaji muvwale mabeji a mfigi. Nenku ke cyôcì aci nkanzu wa ku ib'a muloolo, anyi nkanzu wa muleemule, bidi bantu bavwala diloolo; mwikale lumwenu, umweneka too ne dyamwamwa, anu mabeji a mfigi etu aa cyanaana asokoka kaaba kampanda kaa mubidi wende; mwikale ne kalàmbà kaa dyowela naaku kakayi ne mampinda, anyi dimpinda, kakayi ne mampinda, cya kumutu, mubidi bwashi. Kadi mushindu mwine udi bintu abi byenzeke's!

<sup>56</sup> Pashiishe mêmè kwamba ne: “Ndi mumone mukaji mwimane mu États-Unis, mwenze bu mukalenge mukaji munene anyi cintu kampanda. Uvwwa mwimpè kumona, kadi mwikale ne lwonji mu mwoyi wende. Ke kwenzejaye ditunga bwa dyôdi kwenda mu dikàsà, bwa kulondadi dikàsà dyende yèyè.”

<sup>57</sup> Pashiishe mêmè kwamba ne: “Kundekeelu, Yèyè kungambila bwa kutangila cyakabidi paanyima ku Esete. Nenku pângààkatàngilà, mêmè kumona, byenze bu, mushindu uvwabi, buloba buvwa butuute dikubakuba. Nenku too ne kule kwônsò kûmvwà mwa kumona, kakuvwa cîngà cintu to anu bitupa bya mici, ne—ne mbwebwe ivwa mishaaale yenda yoshika kakese kakese ayi ikaavwa mitaayike mijoomoke mu buloba.”

Ne biine ebi bivwa ne cya kwenzeka kumpala kwa nshiikidilu wa buloba. Nenku bitaanu pa mwandamutekete bikaadi bimane kwenzeka, munda mwa bidimu makumi asatu ne bisatu. Ke twètù abu's, baalukile ku cikondo cya kunshiikidilu!

<sup>58</sup> Ke mêmè kwakula ndwishangana ne ndongolwelu wa cyena mangumba anu piine apu. Ne nciidi ngitabuuja, diloolo edi ne, nciinà cya bucyafu, ne mmwaba udi bukooya bukabwela. Ncyèna mwa kwitabuujuke ne Nzambi mmufwanyine kwangata cintu bu nanku awu mu Ekeleziya Wende to, bwalu bikengela cilediibwe ku Nyuma wa Nzambi ne pashiishe cikezudiibwe kumpala kwa kubiikidiibwaci ne ncyende Yèyè. Mubidi musokome wa Kilisto, tudi babatiijiibwe mu Wôwò ku dibatiiza dya Nyuma Mwimpè.

<sup>59</sup> Eyo, ewu ndongolwelu wa ciinà cya mâyì udi cya bushuwa cileejilu cipwangane cya dingumba. Muntu wa lungenyi bivwa bikengela kutangilaye, bwa kâbwedikù mwômù to, bwalu Nzambi mmujaadike munda mwa bikondo bwa ne Yèyè uvwa ulwishangana naadi ne katuku mwanji kukwata naadi mudimu to. Musumba wônsò ewu. . . Dîbà dyônsò divwa muntu ujuuka ne mukenji, bu muvwu Luther, Wesley, ne bakwabo, ne Smith, ne Calvin, ne bakwabo, pavwabo babanga bulongolodi, Nzambi uvwa wangata cintakanyi aci ucyeyeka mu ditumba kayiku mwa kumwela dîsù kabidi mu ditabuluja to.

<sup>60</sup> Tangilaayi mu maalu malonda. Kakutu kwanji kulwa musangu ukaadiku Nzambi mwangate dingumba, mwenze ditabuluja ku dyôdi adi to, mwaba nansha umwe. Pashiishe, mu maalu malonda ônsò ne ku Bible, bidi bijaadikiibwa ne

ncintu cya bukooya kumpala kwa Nzambi, pa nanku mêmè ncyèna muswe kwikala naaci bwalu to. Nanku ke bwa cinyi ndi mbengangana naaci. Ndi nteeta bwa kupatulamu bantu.

<sup>61</sup> Tudi babiikidiibwe, bu mwakadi mu Izaleela, ke mudibi kabidi mpindyewu, bwa kwikala batangile Izaleela bwa bileejilu. Bôbò, misangu yônsò iwabo bashaala ne Mpokolo awu, bavwa anu bîmpè. Kadi paakaditwabo anu mu didyumbwila biinà bya mâyi, ndongolwelu myenza kudi bantu, dîbâ adi Nzambi uvwa ubashiya panshi. Neatuvwije bya mwomumwe. “MbaMulekele Yêyè, Mpokolo wa Mâyì adi ne mwoyi.” Awu ke mēyì avwa Nzambi ubadyuwila naawu. “Bwa kwenzabo cintu cidibo bafwanyine kwamba ne: ‘Nwamonu citudi twêtù benze’s!’”

<sup>62</sup> Mpindyewu, mu cikondo cya—cya lwendu lwa Môsà; pavwa Nzambi, ku ngàsà, mubape muprofeta, mubape Dikunji dya Kapyà bwa kwikaladi diya kumpala kwabo, mushindike Dyôdì adi ku bimanyinu ne maalu a kukema. Ngàsà ke wâkafila bintu byônsò ebi. Izaleela yêyè ucivwa ujinga, umona anu mikenji. Baakabenga ngàsà, bwa kwangatabo mikenji.

Ke cyôci aci menemene cidi bantu benza leelu ewu. Badi babenga Dîyì, bwa kwangata ndongolwelu wa cyena mangumba, bwalu mwômò amu mmudibo mwa kwenza cyônsò cidibo baswe kabayi banyookiibwa. Kadi kwêna mwa kucyenza mu Kilisto to! Bikengela ulwe mwikale mukezu ne mutooke, bwa kwikala mu Kilisto.

<sup>63</sup> Bashiya mushimì wa mâyi a kazeenze, bwa ndongolwelu anyi ciinà cya mâyi cyenza kudi muntu, nudiku bafwanyine kudifwanyikijila muntu wenza ciine aci anyi? Nudiku bafwanyine kudifwanyikijila ngiikadilu wa mutu wa muntu udi ne mushindu wa kunwa ku mushimì wa mâyi a cyashima a kazeenze, kadi ujinga kushiya ciine aci bwa kuya kanwa ku ciinà cya mâyi cyenza kudi muntu ciikale ne ndimba, ne misodya, ne tuubivuba, ne bikwabo byônsò muntwamu?

Kacyena cyumvwika nansà bu cya meeji ne cikumbane to, kadi ke cyôci aci menemene cidi bantu benze. Mbashiye Dîyì, Mpokolo mulelela wa nsulu wa Bukole bwa Nzambi, bwa kuya kanwa ku biinà, ne kudiyenzela biinà. Cintu cimwecimwe cyakenzabo piine apu, mbacyênzè mpindyewu. Badi bamba . . .

Yêyè wakamba ne: “Mbandekele Mêmè.” Ke Yêyè udi mwambe ewu, mu Yelemiya 2.14 emu, anyi 13, mwômò’s we. Yêyè ne: “Mbandekele Mêmè, Mpokolo wa Mâyì adi ne mwoyi.”

<sup>64</sup> Mpindyewu, tudi tumona cidi ciinà cya mâyi. Tudi tumona cidici ckwata. Tudi tumona mushindu udibo bacyênzè. Ncintu cyenza kudi muntu cifumina ku musaka wa manyaanu. Mâyì adi amata panshi, amacila pa musaka wa manyaanu, adi ôwò anu asukula musaka awu, apwekesha bintu abi mu cinwinu cyenza kudi muntu, apicila mu kaamulonda kenza kudi muntu,

akabwela mu ntanki mwenza kudi muntu. Nenu bukooya bwônsò budi bukakungwila muntwamu, ne twî—twîshî, ne misodya, ne ndimba, ne bintu bya panshi, mushindu awu. Nenu, monaayi, nnyama ya bukooya; tuubivuba, mu mâyi matengebele amu. Kaacivuba kakeena mwa kusombela mu mâyi matooke to. kôkô kasômbèlemù, adi akashipa. Bikengela kàsombelè mu mâyi matengebele.

<sup>65</sup> Nenu ke mudibi ne twîshî twàbûngî etu leelu ewu. Kuyi mwa kusombela mu mâyi matalale a Nyuma Mwîmpè to. Ke bwa cinyi bôbô badi balwishangana anu kashendende ne Dîyî, bamba ne: “Didi Dyôdi diine dyamba maalu abengangana. KaDyena ne bwalu bwa ndolò to.” Mbwalu bidi bibakengela kwikala ne cijibajiba cya mushindu kampanda cya mâyi a matengebele bwa kwikalabo badinyondelamu. Cya bushuwa.

Mmushindu unweumwe awu udibi ne ndimba, ne misodya, ne bivuba, ne bintu bya mushindu awu. Bikengela biye kanyungulukila ku cisense anyi ku cijibajiba cya mâyi a matengebele, bwa kwikala ne mwoyi, bwalu awu ke wabi ngiikadilu ngwa kusombela mwomò amu. Nenu kwèna mwa kushintulula nyama kuyi mushintulule ngiikadilu wende to.

Nenu kwèna mwa kufikisha muntu ku dimona Dîyî dya Nzambi piikala ngiikadilu wende kayi mushintuluke to; nenu piikala ngiikadilu wende mushintuluke muumuke ku cidiye aci, muye ku mwânà wa Nzambi, ne Nyuma Mwîmpè mubwele munda mwende. Nyuma Mwîmpè's ke udi mufunde Dîyî dya Nzambi!

<sup>66</sup> Leelu ewu mvwa nyiikilangana ne mulunda wanyi mwîmpè, Docteur Lee Vayle, udi mwaba ewu mpindyewu mene. Wa bwalu yèyè mmwena teoloji, pa nanku tutu pa ciibidilu tukokanganaku nende ndambu—ndambu mushindu mwîmpè be pa Mifundu. Udi ne meeji matwe be.

Nenu wakankonka musangu kampanda mûmwàku paanyi ngela meeji pa cileeeji cya nzanzanza cya Nyuma Mwîmpè ne: “Civwa ndyakula dya mu myakulu anyi?” Kukaadi bidimu byabûngî.

Mêmè ne: “To; ncyèna mwa kumona ne ng'aci to.”

Yèyè ne: “Nansha mêmè paanyi,” wamba ne, “nansha mudibi ne ke cyakandongeshabo.” Yèyè ne: “Ncinyi cyûdiku peebe mufwanyine kwela meeji ne ke cileeeji?”

<sup>67</sup> Mêmè ne: “Cileeeji cya citambe kwikala cipwangane cîndî mwa kwelela meeji ndinanga.” Ke twètù kuditwa mu muyiiki pa bwalu abu.

Nenu dîbà adi mvwa ndyambidila ne aci ke civwa cyumvwikaku cîmpè mu mushindu wa ne ke mêmè kushaala anu mukwate ku cya ne: “Muntu yèyè mwikale ne dinanga.”

Kadi dîngà dituku Mukalenge, mu cikeena-kumona, kundongololaye. Ke Yèyè kwamba, ne: “Cileeeji cya Nyuma civwa ng’aba bavwa mwa kwakidila Dîyì,” kaciyi nî ndinanga, nî ndyakula dya mu myakulu to, kadi ndyakidila dya Dîyì.

<sup>68</sup> Nenku pashiishe Docteur Vayle uvwa ungambila, ne: “Aci ke cya mu Mifundu,” wamba ne, “bwalu, mu Yone 14, Yesu mmwambe ne: ‘Nyuma Mwîmpè paalwaYe pambidi peenu, Yèyè neanubuulwile maalu aa, àndi Mémè munulongeshe aa, ne neanuleeje maalu acivwavwa.’”

Pa nanku ke cileeeji cishuwashuwale cya Nyuma Mwîmpè ncyôci aci! Katu mwanji kungambilaku cintu kampanda cya mafi to. Nenku: “Cileeeji cya Nyuma Mwîmpè cidi ne, ewu udi mwa kwitabuuja Dîyì.” Wèwè udi mwa kuDyakidila.

Bwalu, Yesu katu mwambeku ne: “Nyuma Mwîmpè paalwaYe, nenwakule mu myakulu” to. Katu mwambeku ne, paalwa Nyuma Mwîmpè, nenwènzè nî ncinyi nî ncinyi cya ku bintu abi to. Kadi Yèyè wakamba ne: “Yèyè neangate bintu Byanyi ebi ne neanuleejebi, ne neanuleeje maalu acivwavwa.” Pa nanku ke cileeeji cya Nyuma Mwîmpè cishuwashuwale ncyaci, bilondeshile Yesu Yèyè mwine.

<sup>69</sup> Pa nanku masaluka ônsò aa ne bintu bidi bantu bapeta ebi ne bicidibo anu ne mwoyi ku byôbi ebi, nudi mwa kumona ne mbwa cinyi badi babyenza. Nwamonu’s, cidi cishaala dingumba, anyi cijibajiba cya mâyi matengebele, ne kwôkò kwine kakwadyakwikalaku dingumba dyanza ne ditent- . . . Dîyì dya Nzambi dipwangane to. Kadyena mwa kucyenzaku to, bwalu kwèna mwa kuvwija Nzambi cintu ciinyika dîna anyi dingumba nansha. To, mukalenge!

<sup>70</sup> Kabingila kadi ne, nudi nupeta musumba wa bantu badi mwa kwitabuuja Dîyì, nubalekela babanga bulongolodi. Katanci aka, mu cidimu cimwepele naka mukaadi musumba wa ba-Rickys bûngi cyanaana muntwamu kanuciya ne cinudi bafwanyine kwenza naabo to. Bakaadi bakwateku, nenku kanuciya mushindu wa kwenza nî ncinyi nî ncinyi pa bwalu abu to. Awu kî ndongolwelu wa Nzambi to. Kî nyèyè to, pa nanku tudi tumanya ne cintu aci cidi ku luseke. Cidi cishaala ciinà, ne cidi cishaala mwaba udi muntu ne muntu mwikale udyà cibanga pa *cikampanda*, *cikansanga*, anyi *cikankenga*, bwa kwikala kubwejamu bidimba, anyi kuvwijamu bantu.

<sup>71</sup> Tudi tujandula ne, ndongolwelu ewu wakabanga musangu kampanda, kalekale mu matuku a beena Izaleela, cikondo civwabo bumbula biine biinà ebi. Nenku kuvwa muntu ne musumba wa Bafaalesa bavwa bumbule biinà kampanda. Nenku bavwa ne muntu dîna dyende Heloode, ne yèyè ewu uvwa mumanyishi wa patooke, nguvena wa ditunga adi.

Ke kupwekaye bwa kuteeleja muntu kampanda uvwa kayi ukutakanangana ne mangumba abo awu to. Uvwa muprofeta.



Ne muprofeta nansha umwe kavwaku bwalu ne dingumba nansha, kadi uvwa yêyè mudikine. Muprofeta awu kubanga kwamba ne: “Kanwikadi nwâbanga kudyambidila munda mwenu amu ne: ‘Tudi ne Abraham bu taatu wetu’ to, bwalu ndi nnwambila ne ku mabwe aa Nzambi udi ne bukole bwa kajuudila Abraham bâna.”

<sup>72</sup> Ke bôbò kutwala muntu wa kuneemekiibwa bwa kulwa kumutelejaye. Ne mwine muntu wa kuneemekiibwa ewu uvwa munyenge mwanaabo mukaji, kadi kumuselaye yêyè. Kadi muntu awu wakapatuka kumpala kwende e kwamba cinyi? Bavwa bôbò beela meeji ne neadye cibanga, wamba ne: “Mpindyewu, mukalenge, wêwè, sòmba mu nkwasu munefuke udi *apa* ewu. Nenku bivwa bikengela bwa wêwè ku- . . . Ndi ne disanka dyâbûngi bu mùdì mulwe kunteelejaku leelu ewu.”

Yone kadi kuya tamakatamaka too ne mwîsù mwende amu, e kwamba ne: “Mikenji kî mmyanyishe bwa wêwè kwikala ne mukaji awu nansha.” Cintu cya kumpalampala cyakambaye, wakanji kumutandisha bwa mpekaatu wende.

<sup>73</sup> Nwamonu’s, mangumba ngadi enza bijibajiba bya mâyi matengebele mudi bantu mwa kwikala benda masandi ne bakaji, ne biine bakaji abu badi mwa kwenza maalu a macimbu, ne kukosa nsuki yabo, ne kuvwala tuputululu, ne bikwabo byônsò, kadi kudibiikila ne mbeena Kilisto.

Kadi Mpokolo mushuwashuwale, aleluuyah, wa Bukole bwa Nzambi, aci kacyena mwa kushaalamu to, bwalu Udi ucisaka ucyela pambelu. “Mêmè ke Mpokolo wa Mâyì adi ne mwoyi. Mbandekele Mêmè, bwa kudyumbwilabo biinà.”

<sup>74</sup> Mpindyewu, mpokolo wa mâyi adi ne mwoyi, mutudi tujandula, mpokolo wa mâyi adi ne mwoyi ncinyi? Twâmanyi kujandula cidi ciinà cya mâyi, mpindyewu mpokolo wa mâyi adi ne mwoyi ncinyi? Mmushimi wa mâyi a kazeenze.

“Mushimi wa mâyi a kazeenze, ke cinyi ciine aci, Mwaneetu Branham?”

Mmushimi udi misangu yônsò anu ufumina mwinshi mwa buloba ne mwikale utuma mâyi àwù pambelu. Adi apweka dîbà dyônsò. Ûdi uditwala wôwò mwine. Mâyì miikale misangu yônsò ne cyashima ne makezuke, mushimi wa mâyi a kazeenze, mpokolo wa mâyi adi ne mwoyi. Kî mmafwe ne matengebele to. Adi ne mwoyi, ashintuluka ku musangu ne ku musangu, atwala cintu kampana cipyacipyà dîbà dyônsò, atungunuka, afumina ku nsulu wawu. Adi ne nsulu wawu pa—panshi paawu apu, padi piikale. . . anu mpokolo wa mâyi adi ne mwoyi miikale anu apaasalala eku ne eku. Adisukula nkaayaawu; mmâyì matooke, makezuke, matooke. Ûdi uditwala wôwò mwine; kabyena bikengela windile mvula bwa kuuja ntanki wende to. Udi anu ùfùkuka misangu yônsò, ufila mâyi àwù cyanaana. Kabyena bikengela wikale uàkòka ne mpompi, umunyungulula,

umunyenguvula, anyi ukadilamikaku to. Udi anu mpokolo wa mâyi adi ne mwoyi.

<sup>75</sup> Nudi bamanye, panudi nwangata biinà bikulakaji ebi, bikengela wikale ubyela manuvele ubyela manuvele ubyela manuvele, ukoka ne mpompi ne bikwabo, bwa kupatula ndambu naka wa miine mâyi a matengebele awu. Huh!

Kadi Mpokolo wa Mâyi adi ne mwoyi udi uApatula, cyanaana, kakuyi bya dikoka ne mpompi, bya diya kadilamika, anyi cintu cikwabo kampanda to. Kaa, ndipu ne disanka bwa Mpokolo awu's we! Eyowa's, mukalenge!

<sup>76</sup> Kêna Yêyè dijinga ne kataacilu kaasaKu to, bwa kukwata twîshî. Bwalu, Udi ufumina mwinshi menemene mwa buloba mwamwa, mu Lubwebwe mwamwa, mu mushindu wa kamuciyiku twîshî nansha.

Kabyena bikengela ikale ne mukusu wa dilonga dya tulaasa mulembelejaKu to, ncya bushuwa, ndongolwelu kampanda mwenza kudi baa pa buloba wa lungenyi lwa cyena mangumba lukwatakaja kudi bantu; bwa kukwambila, kumpala kwa ngangabuka wa mitu, ne udi mukumbane mwa kuyiisha anyi to. Yêyè kêna nansha ne umwe wa ku mikusu ya bukooya ayi mulembelejaKu to. Mmufwanyine kuwusotola dyakamwe kuwela anu kwaka anu paucidi uwuswikilaku apu. Kwêna mwa kucyenza to. Mushimi awu udi ùfùkuka, dîbà dyônsò. Bu wêwè mwa kuswikaku umwe wa ku mikusu ayi, mmufwanyine kuwusotola kuwela anu kwaka ku elu luseke anyi ku lukwabo lwalwa. Kawena ne dîbà dya kuwuswikilabo mukusu wa cyena mangumba nansha.

<sup>77</sup> Kawena dijinga dya kasengulu, anyi kataacilu, anyi dikoka ne mpompi, anyi dijejeje, anyi nî ncinyi cikwabo cyônsò to. Udi anuku, ùfùkuka anu kufùkuka. Kawena ne bwalu bwa kweyemena mvula ya pa kaaba bwa kuwuja to. *Mvula* mbwena kwamba ne “matabuluja,” kudi Mpokolo awu. . . Nku Mpokolo wa Mwoyi awu. “Mwaba udi Mubidi, ke wadisangisha mikanku.” Kabyena bikengela bwa wêwè kukoka ditabuluja ne mpompi nansha; kabyena bikengela bwa wêwè kukoka cintu nansha cimwe ne mpompi to. Cintu cimwepele cidi cikukengela kwenza nkulwa anu ku Mpokolo patupu. Yêyè utu anu mûle tente ne mâyi mîmpè, a cyashima, ne kakutuku ndekeelu bwende Yêyè to. Yêyè udi ùfùkuka anu kufùkuka.

<sup>78</sup> Kabyena bikengela wêwè kuya ku ciinà cya mâyi, kadi kwamba ne: “Ee, paaloka mvula ne kusukulaye musaka wa diyeeba, ke patwapeta cyakunwa.” Nwamonu anyi? Ekelekele, ekelekele! Eci to. Mushimi wa mâyi a kazeeze awu udi usompola mâyi mîmpè, matalale dîbà dyônsò edi. Udi mwa kuweyemena. Kabyena bikengela wêwè kwamba ne: “Ee, nganji kuya ku ciinà cya mâyi cya kale eci. Tuvwa ne ciibidilu cya kukunwa mâyi,

kadi mvula nyeeyi kayiciyi miloke kukaadi ntanta mule. Ndi nkwabwila ne, cidi mwa kwikala cyûme” to.

<sup>79</sup> Mushindu awu ke udi imwe ya ku ndongolwelu myenza kudi bantu eyi. Udi mwa kubwelamu, wêwè mwikale ne cintu kampanda cya cinene ciikale cyenzeka, musumba munene wa ukusumbishila bintu kampanda mu musokoko, anyi—anyi cintu cya mushindu kampanda ciikale cyenzeka, fêtes minene ne bintu binene kampanda biikale byenzeka, manaya a mubela, ne fêtes ya mu nzubu ya mwinshi mwa buloba, ne byônsò abi, udi mufwanyine kubipeta nzubu tente.

Kadi paudi uya mwaba udi Mpokolo awu ùfùkuka, misangu yônsò, bantu badi kuntwaku bapeta mâyi a kunwa mîmpè, matalale. Udi mwa kuMweyemena! Nudi nwamba ne: “Kî mbapete ditabuluja kukaadi bidimu dikumi.” Wêwè mwikale ne mwoyi ku Mpokolo awu, Yêyè awu neikale anu ne ditabuluja dîbà dyônsò.

<sup>80</sup> Bu mwakamba kalumyana kaa ba-Gallois. Anyi, musangu kampanda uvwaku kwenzeka ditabuluja dya ba-Gallois, kwakalwa bantu baa kuneemekiibwa kampanda bafumine ku États-Unis. Bamwe baa ku ba-Docteurs en Divinité aba kuyabo mu ditunga dya Galles, bwa kujandula ne mpenyi piine apu ne bibwa mbinganyi biine bìvwàku abi. Ke kuvwalabo miteelu yabo ya nshingu wa nkoolo ayi, ne bifulu byabo bya lutanda, nenku bavwa benda benda mu müsèsù.

Ke kampulushi kakwabo kadi kenda kalwa aka, kenda kanyungulula mu cyanza kakombo kaaku kaa màtraki aku, kenda kimba mu monzu ne: “Kwaka ku nkuruse kwakafwila Musungidi wanyi, ke kûngààkadilà bwa kukezudiibwa ku mpekaatu; ke kwakalaabiibwa Mashi ku mwoyi wanyi, butumbi kudi Dînà Dyende,” kenda kapweka ne müsèsù.

Ke bôbò ne: “Ewu mmumweneke bu mutendeleedi. Tuye tukamukonkebi.” Ke bôbò ne: “Mukalenge!”

Yêyè ne: “Yè, mukalenge?”

Ke awu kwamba ne: “Tudi balwe muneemu emu buumukile ku États-Unis. Tudi kasumbu kajima kaa batumiibwe. Tudi balwe muneemu bwa kukenketa bwa kumanya cidi ditabuluja dya ba-Gallois, mudibo badibiikila. Twêtù tudi ba-Docteurs en Divinité, nenku tudi balwe muneemu bwa kumanya ne ncinyi ciine aci.” Yêyè ne: “Tudi baswe kumanya ne ditabuluja adi didi penyi, ne mwaba mwine udibo badyenzela mpenyi.”

Yêyè ne: “Mukalenge, nwâfikì. Mêmè ke ditabuluja dya ba-Gallois adi.” Amen! “Ditabuluja dya ba-Gallois adi didi munda mwanyi emu. Ke mwaba udidi disanganyiibwa ngwewu.”

<sup>81</sup> Ke mushindu udibi paudi ne mwoyi ku Mpokolo wa Mâyì adi ne mwoyi. Yêyè udi ne mwoyi dîbà dyônsò, ùfùkuka anu kufùkuka, kufùkuka anu kufùkuka. Kêna ne ndekeelu Wende to.

Kuumusha bya ne: “Anji nda kamonabi tũng ne mudi mâyi, ne tudi bapete mvula mwab’ewu kî nkwanji kunenga to,” kî ng’aci to. M’Mpokolo wa Mâyî adi ne mwoyi awu. Bu mûndî ngamba, Yèyè awu udi ufila Mâyî Ende cyanaana.

<sup>82</sup> Kabyena bikengela wêwè kuswikilaKu mikusu to, bwa kujandula; mikusu kampana ya dilonga dya tulaasa, kumpala kwa nwênù kumutuma bwa kuyaye kayiisha, kwanji kumona ne udi wamba dileeta ne dileeta dya myaku yende bu mudiyi, uyishindumuna bilenga, wamba mênâ ne mipinganyi, ne bikwabo, ne mileeji ngiikadilu. Bââbûngî kabatu nanshâ bamanye ne mbinganyi biine abi to, kadi mwikâle ne mwoyi ku Mpokolo awu anu mushindu umweumwe awu, nwamonus, mushindu umweumwe awu.

<sup>83</sup> Kabyena bikengela kwikalaye mweyemene mvula ya pa kaaba nansha, bwa kumuuja, anyi matabuluja a pa kaaba, bwa nanku awu. Kabyena bikengela kwenzaye nanku to, bwalu bukole bwende ne bukezuke bwende budi munda mwende amu. Ke mwaba udi Dîyî, Bukole bwaDi Dyôdî diine! Padi muntu mwa kuDyakidila mu mwoyi wende, Didi ne bukezuke bwaDi. Didi ne bukole bwaDi. Budi anu mu Dîyî Dyôdî diine, butwâlâ Mwoyi.

<sup>84</sup> Pavwa Izaleela useesuka ku Dyôdî, bavwa bapeta ntatu. Misangu yônsò ivwabo baseesuka ku Dyôdî, bavwa bapeta ntatu.

Bya mwomumwe ne bitudi twenza mpindyewu. Padi ditabuluja diseesuka ku Dyôdî adi, nanku kî mbîmpêku to. Didi didyumbwila ndambu wa biinâ, nenku, anyi ndambu wa biinâ bya mâyi matengebele, ke dyôdî diyaaya dyadya.

<sup>85</sup> Kadi Yèyè uvwa ubakwacisha misangu yônsò. Minunganyi ku Mbû Mukunze, pashiishe paakanunganabo. . .Kadi paabi, mu biine byônsò abi, s’Yèyè ngwâkalaya, mubape mulayi. Nunku Yèyè mmubapingaje anu piine apu, bwa wetu mushindu wa dimona bwalu abu; kadi Yèyè ukaavwa mulaye bwa kuyaye naabo too ne dyamwamwa.

Yèyè wakenza cinyi? Bânâ baa Izaleela abu, Yèyè wakabapa Dikunji dya Kapyâ ne bikwabo byônsò, bu ne ke cishindiki, muprofeta wabo. Ke kubalombolabi too ne ku mbû. Nenku, misangu yônsò, kutu anu ndululu bwa kuCilwisha. Nenku ke Pâlò ne cilwilo cyende balwalwa aba. Kadi nudi bamanye cyakenza Nzambi anyi? Wakakangula anu ciinâ aci cya mâyi makunze, matengebele.

Mbû Mufwe ke cintu cidî citambe kwikala cifwe pa buloba bujima apa. Mmufwe anu cya bushuwa. Mmutengebele. Kakwena cintu cidî mwa kwikalamu ne mwoyi nansha.

Ke Yèyè kumukangula ne kubashiya badishikamine, dyamwamwa. Yèyè kuya naabo too ne ku mwaba uvwabo kabayi mwa kwikala baswikiibwe kudi cintu bu nanku awu to.

<sup>86</sup> Mu cipeela, baakajandula ne ntanki kayivwa mifwanyine kweyemenyiibwa to; ivwa myûme. Bôbò kujandula ne, bakaavwa buumuka ku ciinà cya mâyi baye ku cikwabo. Pavwabo mu cipeela apu, bakaavwa bafwa ne nzala, bafwa ne nyoota ya mâyi a kunwa. Nenku bavwa mwa kuya ku ewu ntanki apa, cijibajiba; cikaavwa cyûme. Baya ku mwaba mukwabo; uvwa mûme. Kabavwaku mwa kudyelela meeji ne bavwaku mwa kupeta mâyi a kunwa to.

Ke pasiishe mu mwaba uvwa kawuyi kwelela meeji mu cipeela cijima amu, kupetabo mâyi. Avwa mu lubwebwe. Avwa mu lubwebwe. Mwaba udi kawuyi kwelelaku meeji wa muntu mufwanyine kupeta mâyi to, uvwa mmu lubwebwe lûme munkaci mwa cipeela. Kadi, nwamonu's, Nzambi utu wenza bintu bya mushindu awu. Mu mwaba udi kawuyi kwelelaku meeji to, mu mushindu wa pabwawu menemene. Ke citukaadi misangu yâbûngî bapetepete.

<sup>87</sup> Bôbò badi beela meeji ne bikengela usangishe mangumba manene, kaaba kamwe, ne kuâsanga ônsò pamwe ne kwenza musumba munene wa bantu mukunyungulukile, ne bikwabo, ne kufikisha bantu binunu ne binunu ku dikwela mu diboko, ne byônsò abi mushindu *ewu*, bwa kupeta ditabuluja.

Misamgu mikwabo Nzambi utu wangata kalumyana kakwabo kadi kakayi kamanye nanshà ABC to, mwine awu anu munkaci mene mwa musumba wa bantu badi kabayi balonge kalaasa mufwanyine kupanga kumanya ne edi diboko ke dyabalume anyi ke dyabakaji, Yêyê udi mwa kujuula ditabuluja diikala mwa kunyungisha buloba bujima. Wakacyenza mu cikondo cya Yone. Wakacyenza mu cikondo cya baprofeta. Kakuvwa nansha umwe wabo, bwa ku dyetu dimanya, uvwaku mulonge kalaasa to, kadi Nzambi uvwa mwa kubakwata kadi kwenza naabo cintu kampanda.

<sup>88</sup> Mu Lubwebwe elu kupatukamu mâyi. Yêyê ke uvwa Lubwebwe alu. Ke Yêyê kutuma dîyi bwa Lubwebwe elu ne, luvwa ne cya kutuuciibwa. Ke kufilaYe mâyi makezuke bûngî cyanaana, a cyashima, matooke kudi bônsò bavwa baswe kunwa. Yêyê kusungila bônsò bavwa baswe kunwa ku Lwôlô alu. Cintu cifwanangane mu mushindu mupwangane ne Yone 3.16.

*... Nzambi wakatamba kunanga baa pa buloba, mu mushindu wa ne yêyê wakafila Mwanende umwepele mulela, ... muntu yônsò wâmwitabuja kafu to, kadi wapeta mwoyi wa kashidi,*

<sup>89</sup> Nzambi wakatuuta Lubwebwe alu, ku Kalvariyo. Cilumbu cyetu cyakapona pambidi Pende, bwa ne kudiYe kufumine Nyuma wa Mwoyi uvwa mwa kutupa wêwê ne mêmê Mwoyi wa Cyendeleele. Ndusumwinu lupwangane lwa Cyôci, mu cipeela mwamwa.

<sup>90</sup> Kabivwaku bikengela bwa bôbò kukoka, kuumbula, kukoka ne mpompi, anyi cintu kampanda to; anu kwikala baabanyanganyi baa mushindu Wende uvwaye mulongolole, cyanaana. Nenku, kabivwa bikengela bôbò kuumbula mu cijibajiba bwa kuàpeta to. Kabivwa bikengela kuàkòka ne mbekeci to. Kabivwa bikengela kunyenguvula manuvele bwa kuàpeta to. Bivwa bikengela anu kuàngata kuànwa.

Nenku ke cyônsò cidiku mpindyewu. Kabyena bikengela bwa wêwè kwikala mwena cikampanda to. Kabyena bikengela kuya katwa binù ku cyoshelu bwa kukwatakaja cintu kampanda, ucikoka ne mpompi to. Kabyena bikengela wêwè kwamba mwaku kwambulula kwamba kwambulula kwamba kwambulula, too ne pawikala ukaadi wakula bintu bibwelakanangane to. Cintu cimwepele cidi cikengela wêwè kwenza cidi anu kuMwangata Yèyè awu, cyanaana, mushindu udi Nzambi mulongolole. Kabiyi bya dyela mpompi, disakila, anyi cinyi to; kwangata anu Cyôci aci, cyanaana. Kakwena cidi cikengela wênzè to; anu kuCyangata kunwa. Mbweni kwamba ne, kuCiitabuujja cyanaana. Ke cyônsò cîndi mwa kwamba pa bwalu abu ncyaci.

Kabyakakengelaku bwa kwenzabo nî ncinyi nî ncinyi bwa kucipeta to. Kabyakakengela kuumbulabo biinà bwa kucipeta to. Kabyakakengela kuyabo ku binù ne kwasa mwadi bufuku bujima, bwa kucipeta to. Baakacyabanyangana anu patupu; lwakatuuciibwa ne lwakashaala lwindile. Ncyà bushuwa.

<sup>91</sup> Nyewu ndi mutangile muntu mulume mpindyewu, musômbe mundekeelu mwa nzubu ewu mwab'ewu. Ndi mvulukka ne mwawa mumwambileci, ku diyeeba dya kale dituku dikwabo, pabwipi ne cidiilu cya nyama.

Ke yèyè kwamba ne: “Kadi ncyèna mwîmpè to.”

<sup>92</sup> Mêmè ne: “Ndi mumanye ne kwèna mwîmpè to.” Ke mêmè ne: “Nanshà mêmè paanyi, ncyèna mwîmpè to.” Kadi mêmè ne: “Wêwè udi utangila ku cyûdi. Kadi lekela kutangila ku cyûdi wêwè, tangila ku cidiYe Yèyè.”

Yèyè ne: “Bu mêmè mwa kulekelaku mfwanka miine eyi, Mwaneetu Branham, nunku ndi—ndi—ndiku mwena Kilisto.”

<sup>93</sup> Mêmè ne: “Kuyilekedi to. Udi ukeba bwa kushaala mwîmpè bwa pashiishe kulwa kudiYe. Yèyè kaakalwa kusungila bantu bîmpè to; Yèyè wakalwa bwa kusungila bantu babi bavwa badimanye ne mbabi.”

Yèyè ne: “Ee . . .”

Mêmè ne: “Teeleja, kwèna muswe kuya mu iferno to, s'mmwômò?”

Yèyè ne: “Eyo.”

<sup>94</sup> Mêmè ne: “Kabyena bikengela uyemu to. Yèyè wakafwa bwa wêwè kwikadi ne cya kuyamu to.”

Yêyè ne: “Bidi bikengela ngènzè cinyi?”

Mêmè ne: “Nansha cimwe. Mbipeepele mushindu awu.”

Yêyè ne: “Kadi bu mêmekù nansha mwa . . .”

<sup>95</sup> Mêmè ne: “Ke wêwè awu’s, ukaadi walukila kabidi anu ku bwalu bwa mfwanka awu. Umusha meeji ku mfwanka awu. Vuluka anu cyanaana, tuma meeji kudiYe Yêyè, cyakenzaYe, cidiYe Yêyè; kî ncyûdi wêwè to. Wêwè kwèna mwîmpè to; kabidi kacya kutuku mwanji kwikala mwîmpè to, ne kwadyakwikalaku mwîmpè to. Kadi, cidiYe Yêyè, Yêyè ngudi mwîmpè!” Ke mêmè ne: “Mpindyewu, cintu cimwepele cidi cikengela wêwè kwenza; piikalabi ne Yêyè wakangata kaaba keebe kuntu kwaka, wêwè udi witaba anu ne budiswîle bwônso cyakenzaYe aci. Cintu cimwepele cidi cikengela wêwè kwenza nkwitaba cyôci aci.”

“Mona’s,” mwakambaye, “aci’s ncipeepele. Ke cîngènzà.”

<sup>96</sup> Mêmè ne: “Kasulu’s nkôkò aka.” Nwamonu anyi? Mêmè kulwa nende apa e kumubatiiza mu Dîna dya Yesu Kilisto.

Bamwe baa ku beena famiye wende mbasômbe mwaba ewu, ne ndi—ndi mumanye ne baakamona bu cintu cya lukutukutu pângâakacyènzà, kadi mêmè nguvwa mumanye cîmvwà ngenza. Ngâkamòna mu muntu awu cintu kampanda civwa cishuwashuwale. Mvwa mwa kucimona mwaba awu, ke mêmè kumwangata e kumubatiiza mu Dîna dya Mukalenge Yesu.

Nenku, patwakamana kwenza nanku, abidi mmîpi ke mêmè kuya kwa mwanende wa balume. Twêtù kumona ci—cikeena—kumona cya mucu mucibukile pa mwaba kampanda, nenku muntu awu e kukuluka, kwambaye kukoseka nyima. Kuyabo nende ku lupitaadi. Ke diloolo diine adi Mukalenge kusokolola Ye, kûndi, ne ke civwa ndekeelu wa mfwanka ayi.

Nenku paakacyabu ke yêyè kujinga kunwa mfwanka. Mêmè ne: “Nêmmusûmbilè dibuki dijima mmutwadile. Kadi nutangilaayi bwa numone ne, matuku ende a mfwanka amanyi kujika.” Katu munweku mucu wa mfwanka nansha umwe to kubangila anu piine apu, ne katu mujingeku nansha umwe to kubangila anu apu. Nzambi!

<sup>97</sup> Nwamonu’s, cintu cya kumpala cidi cikengela bwa wêwè kwenza ncyana kulwa ku Mpokolo awu. Bikengela ulwe ku Mâyì awu, mwikale ufika ku dyumvwa ne kakwena cintu nansha cimwe cyûdi wêwè mwa kwenza to. NcidiYe Yêyè mwenze bwebe wêwè. Kabyena bikukengela kuumbula nansha; kabyena bikukengela kupatula ne mpompi to; kabyena bikukengela kulekela *cikampanda*; kabyena bikukengela kulekela *cikansanga* to. Cintu cimwepele cidi cikengela wêwè kwenza nkukuya ne kunwa. Kwajiki. Pawikala ne nyoota, nwaku’s!

<sup>98</sup> Mpindyewu, Yèyè nguvwa Lubwebwe lwine alu. Nzambi wakaMutuuta bwetu twètù, ke Yèyè kupatula mâyi makezuke, matooke ku bûngi bwawu. Uci ke ngâsà Wende, bushuwa, bwa bantu Bende, twètù aba.

<sup>99</sup> Kudi cintu cifwanangane mwaba awu, cifwanangane ne cya bantu baa lelu ewu, badilongolole bwa kwakidila cidibo mwa kupeta aci, kadi kabayi baswe kwenzelanganaku paabo mudimu to. Izaleela uvwa mudilongolole bwa ku—kunwa ku lubwebwe mpindyewu, kadi kabayi baswe kwenzela Nzambi mudimu Wende uvwa ukengela kuMwenzelabo to.

<sup>100</sup> Nenku Yèyè utu utwenzela anu mudimu misangu yôsò. Nudi bamanye ne, twètù aba katwenaku nansha mwa kweyela kabÿyi Bwende Yèyè to. Katwenaku mwa kweyela kabÿyi Nzambi mutwènzèle mudimu to. Mushindu awu ke utudiku anu Bwende Yèyè. Kabidi, nansha nanku, bidi byamba kutucibula mu bitupa bibidi padibi ne twètù ke badi bateeta kwenza, padibi bikengela twètù kuMwenzela Yèyè cintu kampanda. Yèyè utu utulomba bwa kwenza cintu kampanda, kuya kamona muntu, kuya kasambidila muntu, kuya kakwacisha muntu, bitu byamba kutucibula, bwa kubyenza. Kadi katutu baswe kuMwenzela cintu kampanda bu mudimu to.

<sup>101</sup> Didyabakeena Dyende divwa ne: “Mbandekele Mêmè, Dÿi; kadi mbiitabe ciinà cya mâyi cyele mitanta, pamutu pààDì. Biitaba . . . Mbandekele Mêmè, Mpokolo wa Mwoyi, Mpokolo wa Mâyi a Mwoyi; kadi biikale bajinga bwa kwikala kunwa ku ciinà cya mâyi matengebele.” Nudi mwa kudifwanyikijilaku cyôci aci anyi?

<sup>102</sup> Nudiku mwa kudifwanyikijila muntu mpindyewu, wa ne, ke mushimi wa mâyi a kazeze *ngwewu* mwikale upatula mâyi malenga, a katooto awu, apatukila buludi mu mwoyi wa mbwebwe, lwa mwinshi mwa nsenga ya panshi mwamwa, ne bikwabo, miikale matalale ne mîmpè a menemene; kadi yèyè utamba kujinga kunwa ku ciinà kwaka, cidi ne mâyi adi mabombolokele ku musaka wa diyeeba, ne ya bisaasa, ne ya nzubu yôsò idi myasa pambelu apa eku ne eku eyi? Miikale makelekejila mu ciinà aci, mudi mâyi adi apweka ku ndambu ku ndambu apingana kadi azololokelamu, afumina ku diyeeba, ku bikumbi ne bitanda, ne bintu byôsò byalukila bizololokela mu ciinà amu, kadi twètù tujinga kwitab- . . . ujinga kunwa kwine aku kumpala kwa kuyaye ku mushimi wa mâyi a kazeze? Nkufwanyine kwikala cintu kampanda cipampalamuke mu mutu wa muntu awu. Neya bushuwa.

<sup>103</sup> Nenku padi mulume anyi mukaji ujinga kutwa dingumba nyama ku mikolo, diikale diitaba kubebula kwa nsuki, kuvwala kwa tuputulu, bilaabu bya ku mishiku, ne mishindu mikwabo yôsò ya bintu ebi, ne kandongamu kakese kaa—kaa mushindu



kampanda, ne maalu ônsò a macimbu aa, mwikale mwa kuya mu nzubu idibo banayila ndundu wa bowling, ne—ne ku bintu byônsò bya lukutukutu bya pambelu paapa naka byabya, nenku mwikale mwa kutwala biine abi; ne kunanga biine abi kupita mutuye munange Dîyì dya Nzambi dya cyena kale didi dikosa ne disongangana, diikale dikudimuna bakaji dibavwija bainâbânzà, dibangata dibafikisha ku divwala mushindu udi mukumbane ne dyenza maalu malulame, dyumusha mfwanka ya mici ne ya misenga, ne dicipa ne dyela dya milawu, ne didinga ne diiba, dibyumusha kûdì, dikuumusha maalu ônsò a pa buloba, dikupa Cintu kampanda cidì ciikale disankishiibwa dipwangane. Bwa cinyi mulume anyi mukaji udi uya ku cintu cya mushindu bu nanku bwa kupeta busambi? Mmuniyî mûdì mwa kupeta busambi ku biine abi?

104 Mmuniyî mûdìku mufwanyine kupeta mâyì a cyashima ku ciina cya mâyì matengebele? Mbwa cinyi budi muntu. . . Piikala muntu uya ku ciina cya mâyì matengebele bwa kupeta mâyì a kunwa, padiku mushimi wa mâyì a kazeeze mukangula, udi mufwanyine kwamba ne: “Kudi cintu cipampalamuke mu mutu wa muntu awu.”

Ne padi mukaji anyi mulume uya ku mwaba wa mushindu awu bwa kupeta busambi, kudi cintu cipampalamuke mu nyuma wa muntu awu. Kî mmuswe Dîyì to. Bidi bileeja ne ngiikadilu wende ucidi anu wa ludimba, anyi wa civuba, anyi cintu kampanda, ncyâ bushuwa, cintu cya ngiikadilu awu cidì cinange cijibajiba cya mâyì matengebele, mbwalu bintu bya mushindu awu kabitu bisòmbela mu ciinà cya Mâyì adi ne cyashima to. Kabyena mwa kunanga aci to; m'Mâyì a cyashima. Kabyena mwa kuâswa to.

105 Mpindyewu, didyabakeena divwa ne: “Mbalekele Cyôcì aci.” Ne leelu ewu mbenze cintu cimwecimwe aci.

Mpindyewu tangilaayi mukaji wa ku ciinà cya mâyì. Ee, wakafika ku ciinà cya mâyì cya Yakobo, ne ke kuvwaye usunasuna mâyì misangu yônsò, ku ciinà cya Yakobo. Kadi ciinà cya mâyì cya Yakobo, dingumba adi, mutudi bafwanyine kucibiikila, bwalu wakabyumbula bisatu; ne eci yèyè ngwâkacyûmbula. Mpindyewu, mukaji ewu uvwa ne muyiiki munene. Kwambaye ne: “Mpindyewu, tatwétù ngwâkumbula ciinà eci, Yakobo. Wakanwa mâyì a mwômò emu, ne ngombe yende yakanwa, ne bikwabo. Kî mbîmpèku nanku anyi?”

106 Yèyè ne: “Kadi mâyì audi usuna mwaba ewu aa, udi anu upeta nyoota kabidi, bikengela walukile kabidi mwaba ewu bwa kuâsuna. Kadi,” mwakambaYe, “Mâyì ândì Mèmè nkupa m'Mpokolo, Musulu mwikale ùfùkuka mâyì afumina munda, nenku kuyi ulwa kabidi apa bwa kuâsuna to. Adi anu neebe.”

<sup>107</sup> Monaayi. Kadi paakajandulaye ne Mpokolo wa Mifundu ke wâkaakulangana nende awu, ku cimanyinu cya mu Mifundu civwaye anu ukebekeba, yêyè kushiya ndongolwelu awu wa Yakobo wa cyena mangumba kayiku mwa kukwalulika cyakabidi to, bwalu wakapeta Lubwebwe lwa cya bushuwa. Nwamonu anyi? Kuyaye lubilu mu cimenga. Wakajikijangana ne mpekaatu. Kacivwa kabidi mukaji wa nsômbelu mukooyike to. Kwambaye ne: “Lwâyi, kanumonaayi Ewu ûndi mupete, Muntu Udi mungambile maalu ândi mwenze. Kî n’Yêyè ewu Kilisto mene anyi?” Yêyè. . . Ciinà cya mâyi aci civwa anu cifwanyine kwikala cikumbane; cikaavwa cimane kukumbaja kaaci kiipacila. Mpindyewu ukaavwa ku Mpokolo mulelela. Ciinà cya mâyi aci civwa anu cikumbane too ne dibà dyakalwa Mpokolo mulelela kukanguka. Kadi paakalwa Mpokolo mulelela, ciinà cya mâyi aci cyakajimija bukole bwaci. Ke kusanganaye ne kuvwa mwaba mutambe bwîmpè wa kunwa mâyi.

<sup>108</sup> Nenku kudi mwaba mutambe bwîmpè. Kudi mwaba mutambe bwîmpè, mmu Kilisto. Mu Yone Munsantu 7.37 ne 38, Yesu wakamba, kundekeelu kwa difesto dya maatabernacle ne: “Piikala muntu ne nyoota, alwe kûndi Mêmè, anwe.”

Bavwa bônso mu dicyonkomoka. Bavwa bapete ndambu wa mâyi asukumuka afumina mwinshi mwa cyoshelu, ne—ne kwôkò aku nkuvwabo banwina bônso ku cyôci eci, mu dyenza, dya—dya difesto adi. Ke bôbò ne: “Baataatu beetu baakanwa ku lubwebwe lwa nyuma mu cipeela.” Nudi numona’s, bavwa badyûmbwile ciinà cya mâyi, mâyi kampanda matengebele avwabo bakoka ne mpompi mwaba kampanda, biikale baasukumwina lwa mwinshi mwa ntempelo amu. Nenku bavwa bônso mwa kwikala badikungwija banyungulukile miine mâyi awu baanwa, bamba ne: “Kukaadi bidimu, baataatu beetu baakanwa mu cipeela.”

Yesu ne: “Mêmè ke Lubwebwe luvwa mu cipeela alu.”

Bôbò ne: “Twêtù twâkadyà manà afumina mu Dyulu, ne Nzambi mwine ke uvwa uâlòkesha.”

<sup>109</sup> Yêyè ne: “Mêmè ke Manà miine awu.” Yêyè, Mpokolo awu, uvwa mwimane munkaci mwabo. Dyâmpà dya Mwoyi adi divwa diimane munkaci mwabo.

Kadi nansha nanku bôbò kabavwa anu naaDi bwalu to. Bavwa bôbò bajinga ciinà cyabo cya mâyi; bwalu, muntu nguvwa mwenze eci, nenku Nzambi nguvwa mutume *Cyacya*. Ke dishiilangana menemene ndyôdi adi. Badyûmbwile biinà!

<sup>110</sup> Yêyè ne: “Piikala muntu ne nyoota, alwe kûndi Mêmè, anwe.” Yêyè ke Mpokolo awu.

Nenku bu mudi Mufundu mwambe: “Munda mwende nemwikale mupweka misulu ya Mâyì adi ne mwoyi.” Kaa, Yêyè ke mushimi wa mâyi a kazeeze awu! “Munda mwende, anyi mu muntu wa munda menemene awu, nemwikale mupweka misulu ya Mâyì adi ne mwoyi.”

111 Yèyè ke Lubwebwe, alu luvwa mu . . . Civwa Lubwebwe lwa Hagàà, mu cikondo cya lutatu; pakaavwa mwanende pabwipi ne kufwa, pakavwabo bamwipate mu cituudilu, ne mwikale usanganyibwa pambelu paapa ne Ishamela mwânà. Mâyì ende, mu ciinà cyende cya mâyì civwaye mwambule wenda wenda naaci aci, avwa majike. Ke kulaadikaye Ishamela mwânà awu panshi; kwasaye lwendu kuya, ntanta wa wela mukete ufika, kwasaye mwadi, nenku, kaa, bwalu kavwa muswe kumona muvwa mwânà awu ufwa to. Ke dyakamwe, Mwanjelo wa Mukalenge kwakulaye, ke kupetaye Beer- . . . Beersheba, mu—mushimi uvwa mwaba awu mwikale ne mâyì apweka, ne acidi apweka too ne leelu ewu. Uvwa Beer-Beersheba wa Hagaa, Lubwebwe mu cipeela amu.

112 Luvwa lwimane mwaba ewu mu Mpokolo mûle ne Mashi, dituku adi, lwimane mwaba wawa mu ntempelo. [Katupa kaa mukaba wa mêtì munda mutupu—Muf.] . . . cikondo cya cipeepele cikole. Mu Zakaayi nshapita wa 13, Yèyè uvwa Mpokolo awu mukangula mu nzubu wa Davidi, bwa kukezula, ne bwa (mpekaatu) kukezula kwa mpekaatu. Yèyè ke uvwa Mpokolo awu. Ne mu Misambu 36.9, Yèyè ke uvwa Mpokolo wa Mwoyi wa Davidi. Ucidi anu Mpokolo awu mu nzubu wa Davidi.

Ne Yèyè ke wa mwedi wa kasala ewu, mu mwoyi wende amu. Mwedi wa kasala wakamba ne:

Kudi Mpokolo mûle ne Mashi,  
Makoka mu mijilu ya Êmanûwèlè,  
Bangènzàmpèkààtù badìnè mwìnshi mwa  
nkwaka awu,  
Badi bajimija makeji ônsò a dipiila dyabo.

Yèyè ke Mpokolo wa Mwoyi awu, Mpokolo wa Mâyì. Udi Dîyì dya Nzambi.

113 Bantu baa matuku a ndekeelu aa mbaMulekele Yèyè, Dîyì dilelela, Mâyì a Mwoyi; ne mbadyûmbwile biinà bya mâyì bya cyena mangumba; ne, kabidi, mbakose, mbumbule!

114 Nenku mpindyewu tudi tujandula ne, baakapeta biinà bya mâyì byelè mitanta. Nenku pashiishe ciinà cya mâyì eci ncyûle tente ne twîshî twa bupidyà, maditambishi a bupidyà, ndongamu ya maalu a tulaasa, ne bikwabo, bidi biikale bibengangana ne milayi ya Nzambi. Mbeedi baa mpatà ku Dîyì.

115 Mpindyewu, biinà bya mâyì bidibo bapete ebi, Bible mmwambe ne, bivwa “byelè mitanta.” Ciinà cya mâyì *cyelè mitanta* mbwena kwamba ne ciinà cya mâyì cidi “cizololoka,” cidi kabidi cipweka mâyì ku ndambu ku ndambu. Cidi cyenza cinyi? Cidi cipweka mâyì ku ndambu ku ndambu mu ciinà cya bucyafu cya ntendeleelu cidibo babiikila ne Nsangilu wa Maekeleeziya wa Buloba bujima. Ke kudi ciinà cya mâyì cyelè mitanta aci cikabafikisha, byônsò ebi mbwalu mbaMulekele

Yèyè, nenku bakaadi . . . Mpokolo wa Mâyì adi ne mwoyi; kadi benze biinà bya mâyi ebi.

<sup>116</sup> Bumbule ndongolwelu minene ya malonga a seminere, a tulaasa, ne bikwabo. Ke mushindu wa biinà bya mâyi bidibo bumbula leelu ewu abi, bikengela bwa muntu ikale ne dipoloma dya Ph.D., anyi dya LL.D., anyi dya Licencié, anyi cintu kampanda, kumpala mene kwa yèyè kuya kayiisha. Biinà bya mâyi bidibo buuje tente ne teoloji mukwatakaja kùdì bantu. Badi bababweja mu bilongelu binene ebi bya malonga, nenku mwômò amu badi babapaya ne teoloji wabò bôbò mukwatakaja kùdì bantu, kadi kubatuma bapatuka baya ne byôbì abi. Edi ndituku kaayi ditudi ne mwoyi, biinà bya mâyi byenza kudi bantu! Kabyena bitacisha to . . . Kabyena bikemesha to pakaadi cintu aci cimane kushaala anu—anu mupuuya mubole, kaa, ekelekele, mbwalu bantu badi banwaku.

<sup>117</sup> Nenku padi bantu baswe disanka leelu ewu, badi benza cinyi? Bantu, pamutu paa kwitababo disanka dya kudi Mukalenge, badi bakudimukila ku mpekaatu, bwa kupeta disanka. Bantu bätù bāya mu ekeleeziya biikale balaka mukana bamba mudibo basadidi baa Kilisto abu, padibo bapeta dibinduluka dya menemene badi bakwacisha mucu wa mfwanka. Ne pakaadibo—pakaadibo baswe ku—kuumushaku luteetuku, badi bavwala bilàmbà byabo bidi bisalulangana masandi abi kadi kupatuka e kubanga kukosa mashinda bwa padi balume bapicila mwaba awu, babafikishe ku dibeela kashiba. Badi benza byônsò abi mbwa kwikalabo bamanyike. Mbaswe kufwanangana ne balumyana anyi bakajaana badi bende luumu baa mu cinéma. Ke dyabo disanka ndyadi.

Paabi, Yesu wakamba ne: “Mêmè ke dyabo dikumbanyina.”

Kabingila kadi kenza ne biikale baya ku biine abi, mbwalu kî mbaswe kunwa ku Mpokolo awu to. MbaMubenge. Kî mbaswe kuKunwa to. Badi bakadilamika ku ndongolwelu wa mushindu kampanda mwenza kudi bantu, ciinà cya mâyi cya mushindu kampanda cyûle tente ne bintu bitengebele bya mishindu yônsò, kudibo mwa kwikala baya mushindu awu.

<sup>118</sup> Makeelela awu, tuvwa baye ne bânà pa mâyi a musulu paapa. Ngela meeji muvwa mmu diisambombo mu dinda. Tuvwa bapwekeku; Billy uvwa wenda uloba mu bwâtù. Nenku twètù kubanda ne bânà, mwikulwanyi wa balume ne bakwabo, mwanaanyi wa bakaji, mwanaanyi mukese wa balume, ke twètù kubanda ne musulu bwa—bwa kwendakanaku mu bwâtù. Kuyiku mwa kwendakana mu bwâtù pa musulu to, bwa bantu bakooyike, baa manyaanu, basenji biikale ku musulu aku, bavwale tulàmbà twa tubaleeja anu butaka biikale benza maalu a lukutukutu. Bwâtù bukwabo kuseemenabu pabwîpi neetu apu, musumba wa twânà twa balume twa bidimu dikumi ne bibidi, dikumi ne binaayi, mwânà ne mwânà mukwate kakopo kaa

maala a bière mu cyanza, ne mucu wa mfwanka. Badi babiikila ciine aci ne “kuumusha luteetuku.” Kaa, ekelekele! Buloba ebu budi mwa kwikalaku too ne ku dîbà kaayi’s, ne ndongolwelu wa mushindu awu?

<sup>119</sup> Nenku bwa bôbò kudisuulula ku meeji a ne paafwabo nebaye mu iferno, cintu cidibo benza, badi baya bakadilamika ku cimwe cya ku biinà bya mâyi byenza kudi bantu ebi. Nenku bantu baa mushindu umweumwe awu batu beena ciinà cya mâyi aci. Cidi anu musumba wa misanda ya bukooya, mikooyike ya pa buloba. Nenku badi baswikakana ne cyôci aci bwalu, anu muvwa maamu wanyi mukulakaji ne ciibidilu cya kwamba ne: “Nyuunyi ya masala mafwanangane itu yadisanga.” Bôbò kabatu baswe kulwa mu Mpokolo bwa kusukudiiwbabo ku nsòmbelu wa mpekaatu awu to. Mbaswe kwikala ne wabo nsòmbelu anu pambelu paapa, kadi biikale anu balame bujaadiki bwa ne mbeena Kilisto. Bwa cinyi? MbaMwele Yêyè nyima, Mpokolo mulelela wa disanka, wa Mwoyi, wa Mwoyi ne disankishiibwa bipwangane. Ke bwa cinyi mbenze cyôci aci, bwalu mbaswe kukadilamikaku. Badi ne bantu baa mushindu kampanda badi biitabuujja biine bintakanyi abi.

<sup>120</sup> Mwaba ewu kî nkwanji kupita matuku to, Mwaneetu Fred ne mêmè, ne Mwaneetu Tom, twêtù kuya musumba mujima mu ekeleeziya kampanda wa ba-Baptistes mumanyike bîmpè mu cimenga cya Tucson, bwa kumona ne katuvwaku ne mushindu wa kupeta kaacintu kampanda kavwa pàmwäpa kafwanyine kutupaku ndambu wa cyashima. Ke mwambi kwambaye cintu kampanda cikwabo pa bivwa bitangila bantu mu Ejipitu ne, paakuumukabo bavwa badya matungulu a ayi ne bikwabo, bavwa bajinga kwalukilamu bwa kuya kadya biine abi. Yêyè ne: “Aci ncintu cifwanangane ne cya bantu baa leelu ewu.”

Nenku, twêtù, muntu ne muntu kwamba ne: “Amen!” Ncitu mwanji kumonaku musumba wa bantu wa mushindu wawa to! Ekeleeziya mujima kuumusha mèsù kudi muiyishi kadi kuâtàngija paanyima bwa kumona ne awu “amen” mmutwa kudi nganyi nanku awu. Civwa cyambe kubapa bwôwà bwa lufu. Kabavwa bamanye ne ncinyi ciine aci to.

Paabi, Davidi wakamba ne: “Enzelaayi Mukalenge mutooyi wa disanka. Mutumbishaayi ne nzenze! Mutumbishaayi ne cisanji cya nshinga yâbûngî! Cintu cyônsò cidi cipuuyakana citumbishe Mukalenge. Nenku tumbishaayi Mukalenge!” Nzambi utu ucyonkomokela mu bantu Bende. Badi bayiishiibwe, biikale bamba ne: “Amen,” padi cintu kampanda cyambiibwa mu cyôci.

<sup>121</sup> Bwa cinyi kubenga kwela ndongolwelu ne biinà bya mâyi bya pa buloba ebi nyima, kukudimukila ku ndongolwelu wa lulamatu wa Nzambi, udi mwikale mushimi wa mâyi a kazeeze, Yesu Kilisto? Bwa cinyi kanwena nukudimukila kudiYe Yêyè,

kudi Nzambi mwikale wetu nsulu wa disanka dîngyădîngyâlè, wetu nsulu wa ditumbisha dîngyădîngyâlè, wetu nsulu wa disankishiibwa dîngyădîngyâlè? Ditalala dya wanyi mutu didi difumina kudi Nzambi.

Padi maalu mantonde, ndi mpeta dyanyi disankishiibwa mu Kilisto, kî mmu mfwanka to, kî mmu maalu a pa buloba to, kî mmu kukadilamika ku twitabaayi kampanda to; kadi mmu kuMupeta Yêyè, Dîyî dilaya dyakambaYe ne: “Mêmè muye, Nêndwe cyakabidi bwa kunwangata.” Mu cyôci aci ke mûndi mpetela dyanyi disanka. Yêyè ke dyanyi Disanka.

<sup>122</sup> Badi bamba leelu ewu ne, mu didilamika ku bintu ebi ne mu dyenza dya Nsangilu wa Maekeleeziya wa Buloba bujima, nebênzè mwaba mutambe bwîmpè wa kwikadilamu ne mwoyi. Ku wanyi mmwenenu wa meeji matooke, nebênzè mwaba mutambe bwîmpè wa kwenzelamu mpekaatu. Aci cidu anu . . . Cintu mu kaabujima mmpekaatu, twamb’eku twamb’eku; kî mbwa kwikadilamu ne mwoyi to, kadi mbwa kufwilamu. Badyenzela mwaba wa kusombelamu, anyi, kwenzelamu mpekaatu, pamutu paa kwikadilamu ne mwoyi.

<sup>123</sup> Cintu cikwabo cyônsò, pa kuumusha Yesu Kilisto ne Dîyî Dyende dya Mwoyi, nciinà cya mâyi cyelè mitanta. Cintu cyônsò cidu citeeta kwangata kaaba kaa Dyôdi adi; cyônsò cyûdi uteeta kwenza bwa kukutwadila ditalala, cyônsò cyûdi uteeta kwenza bwa kukutwadila busambi, disanka nî ndya mushindu kaayi dyûdi upetela ku cintu cikwabo cyônsò, bu ne cidu cyangata kaaba kaa Dyôdi edi, nciinà cya mâyi cyelè mitanta cyûle tente ne bukooya. Yêyè ngudi ufila disankishiibwa dipwangane.

<sup>124</sup> Ndi muvuluke mwaba ewu, kukaadi mivù ya luuya ibidi, mvwa mupatukile ku ciibi cya kumfundu. Kuvwa kansongalume kaa kakenyakenya ku mênù pambelu paapa kangambila, ne: “Udi mumanye, cidu cikwenza ne wikale misangu yônsò anu wamba bakaji mushindu awu, bwa divwala dya tuputulu ne bikwabo abi,” wamba ne, “mbwalu wêwè ukaadi mukulakaji.” Yêyè ne: “Ke cidu cikwenza ncyaci.”

Mêmè ne: “Tangila kunu. Wêwè udi ne bidimu binga?”

Yêyè ne: “Makumi abidi ne mwandamutekete.”

<sup>125</sup> Mêmè ne: “Pâmvwà mushaadile kûdi ne bidimu byâbûngi, mvwa nyiisha cintu cimwecimwe aci.”

Ndi mupete Mpokolo wa disankishiibwa. Yêyè ke cyanyi cidibo bangaabanyine. Amen! PacidiYe anu ucimpeteshu, ke bulenga mbwabu. Aci ke—aci ke wanyi . . . Ke dyanyi dipiluka ndyadi, nkwikala kuMubandila, ntangila mudi cyanza Cyende cikwata mudimu ne mmona mudiYe wenza. Kakwena mpokolo mukwabo ûndi mumanye to!

Kaa, musulu awu ngwà mushinga mukole  
 Ùdi umvwija mèmè mutooke bu nêjè;  
 Kakwena mpokolo mukwabo ùndi mumanye,  
 Cintu nansha cimwe to anu Mashi a Yesu.

Kudi Mpokolo mùle ne Mashi,  
 Makoka mu mijilu ya Emanuwele,  
 Mudi bangènzàmpèkààtù badiina mwinshi  
 mwa nkwaka awu,  
 Bajimija dikeji dyònsò dya dipiila dyabo.

<sup>126</sup> Nyawu nzwambila's, kakwena mpokolo mukwabo ùndi mumanye to pa kuumusha Mpokolo awu. Yêyè wakankezula pâmvwà ne manyaanu. Udi undama mukezuke, bwalu ntu mujinge kwikala musòmbèle anu pabwipi Nende apu, kwikala kunwa Màyì a cyashima aa adi uuja musuuka wanyi ne disanka.

Ndi mwa kwikala ne dibungama dinene, ndyumvwa ne ncyênàku mwa kuya...mu lukwabo lwendu lwa mudimu, ncyèna mwa kuya mwaba mukwabo to; pa dîbà adi ndi mwa kutwa binù, kutwa munu wanyi pa mulayi kampanda, kwamba ne: "Mukalenge Nzambi, Wèwè ke dyanyi dikanda. Wèwè ke dyanyi disankishiibwa. Wèwè ke byanyi byònsò-mu-byònsò." Ndi mwa kubanga kuumvwa Cintu kampanda cîfùkukila lwa munda mwanyi menemene mwamwa. Ndi mpatuka mu cyôci aci.

<sup>127</sup> Bu mûnkaadi ne bidimu bipite pa makumi ataanu, ndi mufwanyine kubiika mu dinda kampanda, nudi bamanye anu mushindu utubi awu, kuyiku ne mushindu nansha mukese wa kwambula dikàsà kudyumusha pa bulaalu apu to. Ekelekele, kuyiku mwa kucyenza to; muntu pende mwimane ku ciibi, ukookola, anyi Billy mwikale ungambila ne kudi bwalu bwa lukasalukasa, mwaba kampanda udi ukengela bwa mèmè kuya. Ke mbanga kudyambidila ne: "Nèngènzè ciine eci bishi?" Kuteeta mwa kujuula anu dikàsà dimwe cyanaana.

Ndi ndyambidila ne: "Wèwè's ke Mpokolo mùle ne dyanyi dikanda. Amen! Dikanda dyanyi ne dikwacisha dyanyi bidi bifumina kudi Mukalenge. Wèwè's ke wanyi mushimi wa màyi a kazeeze! Wèwè's ke bwanyi bunsonga! 'Aba badi bindila Mukalenge ne bawijulule dikanda dyabo dipyadiya; nebabande muulu ne mapwapwa bu mukanku; nebaneeme lubilu, kabayi bacyoka; nebèndè lwa makàsà, kabayi bapangila.' Mukalenge Nzambi, eci mmudimu wanyi, bwa kuya. Nyewu bambiikila ku mwaba wa mudimu." Neku katanci, Cintu kampanda cidi cibanga kusaba munda mwanyi.

<sup>128</sup> Dîngà dituku, mu kaaba kakese kampanda, mvwa ngenza disangisha lwa mu Topeka, mu Kansas emu; muvwa nsongalume, muyiishi wa kânàkânà, umwe wa ku bantuudidi baanyi baa mfranga baa kumpala. Mwaneetu Roy, udi musòmbè apa ewu, mmuvuluke kaaba kiine aku. Emu, emu mu mwaba munene mwamwa, muvwa ka—ka...Mwambi ewu uvwa mukapicile

mwinshi mwa musaka anyi kaaba kampanda, cimana cya ku luseke e kumuupukilaci ne yèyè kushaala mwinshi mwaci. Mukwetu wa kânâkânâ awu uvwa ufwa. Mucima wende wakataayika. Lubalenge lwende kupampalamukalu. Binunu bya kilô bivwa bimwikile.

<sup>129</sup> Mvwa musòmbè ndya cyakudya cya dinda, nyiikilangana ne mukajaanyi. Mêmè ne: “Mukajaanyi, udi mumanye, bu Yesu mwikale mwab’ewu, udi mumanye civwaYe mwa kwenza anyi?” Mêmè ne: “Yèyè paakantuudilaye mfranga apu: ‘Ndi mwitabuuje Dîyì adi,’ Kilsto nguvwaye utuudila mfranga awu.” Ke mêmè ne: “Aci ndiyelè dya dyabulu.” Mêmè ne: “Bu Yesu mwikale mwab’ewu, Yèyè uvwa mwa kuya kamutentekela byanza Byende bya cijila abi. Nsongalume awu nunku’s uvwa umvwa bîmpè. Nansha mudibi ne mucima wende mmutaayike amu. Uvwa mwa kuumvwa bîmpè, bwalu Yesu uvwa mwa kubwelamu mwikale mumanye anu menemene ne Yèyè udi Nganyi. Yèyè uvwa mumanye dibiikila Dyende, Mifundu ivwa milelela, ishindika mu Yèyè amu ne Yèyè uvwa mumanye ne Uvwa Nganyi, kabiyi bya . . . kakuyi mpatâ nansha ya kânâ to. Nunku Yèyè mmumutentekela byanza, wamba ne: ‘Mwanaanyi, umvwa bîmpè,’ upatuka mwaba awu.” Ke mêmè ne: “Kakwena démons mu iferno bûngî bukumbane bwa kushipa nsongalume awu nansha, pa dîbâ adi.” Mêmè ne: “Uvwa mwa kuumvwa bîmpè.” Kadi mêmè kwamba ne: “Udi umona, munanga wanyi, Yèyè uvwa Yesu, byanza bya cijila bya Nzambi.”

Mêmè ne: “Mêmè ndi ngènzâmpèkââtù. Ndi mulediibwe ku disangila dya mulume ne mukaji. Wanyi taatu ne wanyi maamu bavwa bangènzâmpèkââtù, ne mêmè ndi anu cintu cya cyanaana kaciyi nansha cîmpè to.”

Ke mêmè ne: “Kadi udi mumanye? Bu Mukalenge mwa kumpa cikeena-kumona ne kuntuma kuntwaku, dîbâ adi aci’s neciikale bwalu bukwebu.” Mêmè ne: “Nunku ndi mupwekeku e kumutentekela byanza, nunku mmujuuke mu bulaalu abu bu Yèyè mumpe cikeena-kumona.”

<sup>130</sup> Pashiishe mêmè kubanga kudyambidila ne: “Byôbî biine, bu biikala cikeena-kumona, civwa ncinyi? S’civwa anu byanza bya manyaanu bimwebimwe ebi bîmvwâ nkamutentekela, uh-huh, muntu anu umweumwe awu umusambidila, byanza bya manyaanu bimwebimwe abi.”

Pashiishe mêmè kubanga kudyambidila ne: “Mêmè ewu’s ndi mwènâmpalâ Wende. Pa dîbâ adi, Nzambi kèna ummona mêmè to. Mashî awu a Mwakane awu adi asanganyibwa pa cyoshelu paapa; Ôwò ngadi angakwila. Yèyè’s ke dyanyi dikumbanyina. Yèyè ke dyanyi disambila. Yèyè ke wanyi Mwoyi.” Mêmè ne: “Cintu cimwepele cidi cifwanyine kwenza ne mmutentekela byanza, ne diitabuuja, mbwalu ndi ne diitabuuja mu cikeena-kumona. Kadi kakuyi cikeena-kumona, diitabuuja anu dyôdi



dimwedimwe adi's nedyènzè cintu cimwecimwe aci; nenku ndi mwa kudibala bu cintu cyanaana, kadi kuMubala Yèyè ne mbyônsò-mu-byônsò byanyi. Yèyè ke wanyi Mwoyi. Yèyè ke wanyi Udi muntume ne mudimu. Dingumba nansha dimwe kî ndintume to; Yèyè ngudi muntume. Aleluuyah! Ndi nya mu Dînà Dyende Yèyè. Nèmmutentèkèlè byanza." Mémè kupweka kuntwaku ne kutentekela nsongalume awu byanza, ne diloolo adi uvwa mu disangisha, ne mubidi tumatuma. Amen!

<sup>131</sup> Kaa, eyo, Yèyè ke Mpokolo awu. "Kakwena mpokolo mukwabo úndi mumanye to. Cintu nansha cimwe to pa kuumusha Mashi a Yesu!" Mémè ndi wa mupuuya mubole, ndi muntu mupidye diitabuuja, ke cidi muntu ne muntu wa kutudi, kadi kumpala kwa Nzambi tudi bapwangane. Ye- . . . "Nanku ikalaayi bapwangane, anu mudi Taatu wenu mu Dyulu mwikale mupwangane." Udi mwa kwikala nanku munyi? Bwalu Ewu udi mupwangane udi uleeja mpala pa kaaba keetu kwòkò aku. Mpokolo awu udiku dituku dyônsò, ne cyashima. Kaciyi cintu kampanda citengebele to, kadi ne cyashima dituku dyônsò, usukula mpekaatu yanyi yônsò. Yèyè ke Mpokolo awu.

<sup>132</sup> Mpindyewu bwa kujikija, ndi mufwanyine kwamba nenku ewu. Byônsò bidi bishiilangane ne Eci mbiinà bya mâyi byelè mitanta, ne ndekeelu wa byônsò nebiikale bikaadi bizololoja byûdi welamu; wèwè wela ditekemena dyebe dyônsò, dîbà dyebe dyônsò, ne byônsò, mu cyônsò cya ku biinà bya mâyi matengebele abi. Yesu wakamba ne mbiinà bya mâyi byelè mitanta. Nzambi wakamba ne: "Mbyelè mitanta, ne nebizololoje cyônsò cinwelamu aci." Kwèna mwa kuya naabi kule to, bwalu nebizololoke. Bwalu Yèyè ke njila umwepele udi ufila ku Bulelela, ku Mwoyi, ne ku disanka dya Cyendelelele, ne ku ditalala dya Cyendelelele. Yèyè ke Umwepele udiku ne njila umwepele udi ufikisha ku Cyôci aci. Kaa, ekelekele!

<sup>133</sup> Mpokolo wa Mwoyi udi kayi ukama n'Yesu Kilisto. Bwa cinyi? Ne Yèyè udi Nganyi? Dîyi, umweumwe awu; Dîyi, Mwoyi, Mpokolo, "umweumwe awu makeelela, leelu, too ne kashidi." Bwa mwena kwitabuuja mulelela, Aci ke dyende disanka ditambe kutumbuka, wende Mwoyi mutambe kutumbuka. Ne dyende disankishuibwa ditambe kutumbuka didi mu Kilisto. Kabiya bya dipatula ne mpompi, kabiya bya dikoka, kabiya bya dikadilamika, kabiya bya ditunta to; anu kwitabuuja ne kwikisha cyanaana. Ke cyôci aci cidiYe bwa mwena kwitabuuja.

<sup>134</sup> Bu taatu Abraham; kavwaku ukoka, kavwaku ulubakana, kavwaku wabakaja mwoyi to. Yèyè uvwa ne Dîyi. Uvwa mulaadile mu cyâdi cya El-Shaddâi. Paakapeta Abraham bidimu lukama, Nzambi wakamumwenekela, kwamba ne: "Ndi Wa bukole bwônsò." Mwaku wa cyena Ebelu udi *El Shaddai*, udi uumvwija ne, "Wa Mabeele." "Nenku nyewu ukaadi mukulakaji, ne dikanda dyebe dimane kujika, kadi shaala anu mulaadile mu cyâdi Cyanyi Mémè wikale wamwa dikanda dyebe ku

Mpokolo ewu.” Amen! Uvwa wamwa bwa kupeta cinyi? Mubidi mupyamupya. Wakapeta mwânà, kudi Sarah. Nenku, paanyima pa bidimu makumi ataanu, kupetaye bânà mwandamutekete bapetela kudi mukaji mukwabo.

<sup>135</sup> Kaa, El-Shaddai! Dipungila Dikulukulu didi dileeja cyakenzaYe, Dipungila Dipyadipya didi dileeja cyenzaYe. Amen! Mu Dipungila Dikulukulu . . .

<sup>136</sup> Mpindyewu kapeepe nkaaka kaajiki, nanku nêndwijakajè bwa ngimanyikile mwaba ewu mpindyewu, mu katanci kakese cyanaana.

Ndi njinga kwamba eci kumpala kwa mêmè kujikija. Ntu mupete cileejilu cya bwalu ebu musangu kampanda. Mvwa munkaci mwa kwenza mudimu wa bukontononyi. Ne bantu bààbûngì mwaba ewu . . . Mwamwa mu nyungulukilu wa Georgetown, mwamwa mu Milltown, kale wàwa, mundekeelu mwa mikuna mwamwa, muvwa mpokolo kampanda. Civa mmushimi wa mâyi a kazeze. Uvwa upwidila mâyi aya muulu mu butumbuke bwa bwipacila mètre umwe ne-ne centimètres makumi abidi anyi mètre umwe ne centimètres makumi ataanu, miikale anu atunkumuka dîbà dyônsò, mwikale mpokolo munene menemene bwa mu nyungulukilu awu. Nenku mu nyungulukilu menemene wawu amu muvwa nyemba lubwici eyi yàbûngì, nudi bamanye, ne bintu biikale bitolokemu, bidi bifwanangane ne bidibwalwenyi abi. Nenku, kaa, mvwa ngumvwa anu nyoota ya kufikaku mwaba mwine awu, kaa, ekelekele, bwa kufikaku ku mpokolo awu. Nenku mvwa ndyololaku panshi ku luseke lwa cintu aci kadi kunwa anu kunwa, ne kusômbela panshi bwa kunwa, kwindila.

Nenku ku cidimu ku cidimu mvwa anu ngenza kulwa ku mpokolo umweumwe ewu. Kayiku mwa kuuma to, nansha mu mushipu nansha mu mvula. Kabavwaku mwa kumuvwija dibwe to. Kwêna mwa kuvwija mushimi wa mâyi a kazeze dibwe to. Kaa, to! Kaa, to! Nansha mashika menze a bishi—a bishi, kaena mwa kuwuvwija dibwe to. Wêwè udi mwa kuvwija ciinà cya mâyi dibwe; anu mashika makese cyanaana aa neàcyènzè nanku. Nwamonu anyi?

Kadi cintu cyônsò cidi cinyungakana, ciikale ne Mwoyi munda mwaci, cidi cyendakana eku ne eku. Nenku kamwena mushindu wa kuvwija Mushimi wa mâyi a kazeze dibwe to. Nansha nyuma wa mu nyungulukilu wa mwaba awu mwikale wa dibungama munyi, Mushimi ewu udi misangu yônsò anu ne mwoyi. Sômbelàayi ku Mushimi awu.

<sup>137</sup> Nenku mêmè kumona mwaba awu, mvwa mwa kukuya ne kunwa mâyi a kuntwaku, nenku, kaa, ekelekele, mâyi miikale anu a cyashima! Kuyiku mwa kwabakaja mwoyi ne: “Ndi ndikonka, pângââfika kwine aku, ndi ndikonka ní ngaawusangana kawuciyi upweka?” Utu anu upweka . . .

138 Cidimè wa kale wakangambila, wamba ne: “Kakwányi mulume wakanwa mâyi a kuntwaku.” Ke yêyè ne: “Kawutuku mwanji kukeepela bunene anyi cinyi to. Udi anu wôwò mushimi umweumwe awu, mwikale anu utunkumuna mâyi ukaela mu musulu wa Blue River wawa.”

139 Mêmè kudyambidila ne: “Kaa, ekelekele, mwaba bwîmpèwu wa kwikala kubikula mâyi’s we!” Mvwa mwa kwenda ntanta nansha wa kilomeeta mujima ne citupa mupatuke mu njila, bwa kufika mwine mwaba awu, bwalu uvwa mmwaba wa bushuwa ewu bwa kwikala kunwinaku mâyi. Kaa, mâyi miine awu bwîmpèwu’s we! Kaa, ekelekele!

Ntu mwa—ntu mwa kuya kuntwaku mu cipeela aci, mu Arizona mpindyewu, ntu anu ngeela meeji ku mâyi awu ne: “Mushimi mulengele awu wa kuntu kwaka, ngaadyololapu panshi ku luseke lwawu aku’s we!”

Bu mwakamba Davidi musangu kampana ne: “Kaa, ngîkalakù kabidi ne mushindu wa kunwa ku mushimi awu’s we!” Bu yêyè nansha ne mushindu wa kukufika!

140 Nenukù mêmè kusòmbelakù panshi dituku dikwabo, ke kungenzekelaku kaacintu kaa tuseku. Ke mêmè kwamba ne: “Cidi cikupa disanka dîbà dyònsò nenukù ewu ncinyi? Ndi njingaku kupeta disanka dya mushindu awu. Mona’s, kacya ncutuku mwanji kukupeta mubungame to, kacya anu ngâbanga kulwa kaaba aka. Kakuyiku kantu nansha kamwe kaa kaleeja dibungama kùdi.” Mêmè ne: “Utu misangu yebe yònsò anu mûle tente ne disanka. Udi utupika ufùkuka ne ucyonkomoka. Nansha mu mushipu nansha mu mvula, kwikale mashika anyi luuya, mwònsò mwikalaku amu, utu misangu yònsò anu mûle tente ne disanka. Ncinyi cidi cikwenza ne. . .? Ncinyi, ncinyi ciine eci? Mbwalu ndi nnwa mâyi ebe anyi?”

“Bwăla.”

Mêmè ne: “Ee, pâmwăpa mbwalu tûlulù tûtu tunwa mâyi ebe, nenukù peebe munange ciine aci bikole.”

“Bwăla.”

Mêmè ne: “Ee, kadi cidi cyenza ne wikale ufùkuka mushindu awu ncinyi? Cidi cyenza ne wikale ne disanka mushindu awu ncinyi? Cidi cyenza ne wikale misangu yònsò anu mûle ne disanka ncinyi?” Mêmè ne: “Mbwa padi—padi nyuunyi inwa mâyi ebe anyi?”

“To.”

“Mbwalu mêmè ndi nnwa mâyi ebe anyi?”

“To.”

Mêmè ne: “Cidi cyenza ne wikale misangu yònsò anu mûle ne disanka mushindu ewu ncinyi?”

141 Nunku bu mushimi awu ne mushindu wa kungandamu, nunku mmwambe nenku ewu: “Mwaneetu Branham, kî mbwa paudi unwa to; ntu mwanyishe ciine aci, ne bu mûndi mwa kunwisha ne nyuunyi. Ntu nnwisha ne muntu yônsò udi ne dijinga dya kunwa. Cintu cimwepele cidi cikengela wêwê kwenza nkulwa apa ne kunwa. Kadi, cidi cimpa disanka, kî mmêmè udi ufùkuka to, ncintu kampanda lwa munda emu, ciikale cinsaka. Ncintu kampanda cidi cyenza ne ngikale mfùkuka.”

142 Nunku ke mushindu udibi ne mwoyi udi mùle tente ne Nyuma. Anu mwakamba Yesu, Yêyè uvwa . . . Nwamonu’s, Yêyè mmunupe mishimi ya mâyi miikale ipweka too ne ku Mwoyi wa kashidi, mushimi wa mâyi a kazeeze, mushimi udi utunkumuka mùle uyiila ne panshi mwikale anu upweka ku musangu ne ku musangu. Nansha bakwabo baa mu ekeleeziya babande anyi bapweke, wêwê udi anu ku Mushimi awu.

Bwa cinyi bunudi bafwanyine kwangata ndongolwelu wa kale ne ciinà cya mâyi bya cyena mangumba, byûle tente ne twishì ne bikwabo byônsò, nunwa banyungulukile cintakanyi cya mâyi matengebele aci, panudi babiikidiibwe bwa kulwa ku Mpokolo, ku Mushimi wa mâyi a kazeeze?

143 Ndi anu ngeela meeji muvwawu usukuma, ne wela muulu wakidila, ne—ne usaba, ne useka, ne usanka, ne utupika, ne unaya ne disanka. Kwikalè mashika, mvula; kwikalè luuya lukole, mushipu, pavwa myaba mikwabo yônsò ya mu ditunga miikale yuminyina apu, wôwò uvwa ùfùkuka anu mwawu ne kale. Bwalu uvwa ufumina mu ndondo, mwele miji, mwinshi menemene mu mbwebwe.

144 Kaa, ngikaleku ne mwoyi ku luseke lwa Mushimi udi utunkumuka awu! Angataayi ndongolwelu yenu yônsò mikwatakaja kudi bantu inudi baswe ayi, mishimi yenu yônsò idi ne mâyi matengebele ayi, kadi ndekelaayi mêmè ndwe ku . . . anyi biinà bidi ne mâyi matengebele’s we. Kadi, ndekelaayi mêmè ndwe ku Mpokolo ewu, ndekelaayi mêmè ndwe kudi Yè kacya anu uula tente. Yêyè ke dyanyi Disanka. Yêyè ke bwanyi Bukênkè. Yêyè ke dyanyi—Yêyè ke dyanyi Dikanda. Yêyè ke aanyi Mâyì. Yêyè ke wanyi Mwoyi. Yêyè ke wanyi Mwondopi. Yêyè ke wanyi Musungidi. Yêyè ke wanyi Mfumu. Cyônsò cîndi naaci dijinga cidi cisanganyiibwa munda Mwende. Mbwa cinyi bûndi mwa kujinga kuya ku cintu cikwabo?

145 Mwaneetu wa balume, mwaneetu wa bakaji, kwênàku muswe kulwa ku Mpokolo ewu diloolo edi anyi? Kwêna muswe anyi, piikalabi ne kacya kutu mwanji kukuya, kwênàku muswe kuMwakidila diloolo edi patudi twinyika mitu yetu apa anyi?

146 Biinà bya mâyi byelè mitanta, bizololoka, bipweka ndambu ndambu, maalu a pa buloba miikale apwekelamu ndambu ndambu, bukooya bwa ku mayeeba ne bwa matuku makwabo.

Bwa cinyi kubenga Mushimi ewu, mudi bintakanyi abi kabiyi mwa kushaalamu, Mushimi munene ewu udi mûle tente ne Mashi, makoka mu mijilu ya Emanuwele? Bwa cinyi kwêna muswe kwakidila cyôci aci diloolo edi? Nzambi atukwacisheku diloolo edi, mu buloba bûme ebu, mudi nyoota isuma emu. Bu mwakamba muprofeta ne: “Yêyè udi Lubwebwe mu buloba bûme.” Yêyè ke Mpokolo awu. Kanwenaku baswe bwa kulwa kudiYe diloolo edi, mu myoyi yenu amu, patudi tusambila apa anyi?

<sup>147</sup> Taatu wa mu Dyulu munanga, kakwenaku mûngà Mpokolo to, bu mudi mujiki mwikale wimba ne: “Kakwena mpokolo mukwabo ûndi mumanye to; cintu cikwabo to pa kuumusha Mashi a Yesu.” Mwômò amu ke mûndi mulediibwe, mukolelemu; ndi muswe kwikala musòmbèlemù, ne kufwilamu, ne kubiikilamu ku lufu, mu Bwikadi Bwende. Misangu yònsò, Mukalenge, ndekele ngikaleku mu Bwikadi Bwende, bwalu kakwena mûngà mwaba ûndi mumanye to. Kakuyi twitabaayi, kakuyi dinanga; kakuyi dinanga to pa kuumusha Kilisto, kakuyi twitabaayi to pa kuumusha Kilisto, kakuyi mukanda to pa kuumusha Bible, kakuyi cîngà cintu nansha cimwe, kakuyi disanka to bwa pa kuumusha munda Mwende Yêyè. Bôbò baMuumushe mu mêmè, Eyi Nzambi, bintu bya pa buloba bîndi naabi nansha byôbi biikale búngi munyi, mbi—mbifwanyine kwikala anu bifwe, ndi mufwanyine kwikala nkaadi ndalakana anu ne byanza biteeka mu mutu. Bôbò baMuumushe mu mêmè, bwanyi’s bwâtùuku, Mukalenge. Kadi enzaku bwa Yêyè ikale munda mwanyi, pa dîbà adi ngondo wa dikumi ne mwibîdi udi usankisha anu mudi ngondo mwitânù amu, pa dîbà adi kakwena myaba ya luuya lukole ne kakwena myaba myûme to, nansha lufu lwine kalwena ne bucimunyi nansha bwa kânà to. Enzaku bwa twikale Nende Yêyè, Taatu. WâMufilakù wabûngi, wa uyiila ne panshi, kudi mwena kwitabuuja yònsò mwaba ewu diloolo edi, bu mudibo kacya bindila mu nzubu emu.

<sup>148</sup> Nebikengele bwa bàabûngi baa kudibo kwendeshabo mashinyi njîla mule diloolo edi, bu mwikalabo mwa kwalukila ku maabo, nenku enzaku bwa biikale badyambidila ne: “Mêmè ndi musòmbèle ku Mpokolo awu. Ke kûndi musòmbèle, mwikale nnwa mâyi a cyashima, ku dîbà ne ku dîbà.”

<sup>149</sup> Nenku piikalabo kabayi banji kupeta aci to, too ne mpindyewu, enzaku bwa baMupete mpindyewu, bwa baamona mwa kwangata Mpokolo awu kuya nende. “Nênye neenu; Nêngikalè neenu too ne kundekeelu kwa buloba.” Twénzèléku bintu ebi, Taatu.

<sup>150</sup> Nenku mpindyewu patudi ne mitu yetu miinyika apa, kudiku muntu kampanda mu mwaba ewu, diloolo edi, anyi mbanganyi badiku bafwanyine kwamba ne: “Mukalenge, nda naanyi ku Mpokolo awu anu mpindyewu mene. Ncyèna mulwe mwaba ewu anu bwa kuteeleja cyanaana to; ndi mulwe mwaba ewu mbwa

kujandula Cintu kampanda. Ndi mulwe mwaba ewu mbwa kuKupeta Wêwè, Mukalenge. Ndi Neebe Wêwè dijinga diloolo edi. Lwâku mu mwoyi wanyi anu mpindyewu. Udiku mwa kuswa bwa kucyenza anyi, Mukalenge?” Nzambi anubeneshe. Mukalenge abeneshe umwe ne umwe.

<sup>151</sup> Taatu, Wamonu byanza, nansha kuulu kwaka ne mu nyungulukilu wa cimanu, ne mu bibambalu bikwabo, ne pambelu. Wêwè—Wêwè wabamonu, Taatu. Ndi—ndi ndomba ne Wêwè ufile byônsò bidibo naabi dijinga. Pâmwâpa bavwa anu banwa ku ciinà kampanda cya kale, Mukalenge, ciikishilu kampanda cyanaana cya mu citupa cya njila mudi muntu kampanda muumbule ciinà, cikaadi citapile twîshî twa malongesha a pabwawu a mishindu yônsò, miikale avila Dîyi. Nyewu ndomba, Nzambi, bwa diloolo edi balwe kudi Yêyè Udi mwine Mpokolo awu, Mpokolo wa Mwoyi awu. Twênzèlèku nanku, Taatu. Nyewu mbalambula Kûdî mpindyewu mu Dîna dya Yesu.

<sup>152</sup> Ne Wêwè mwine utu mungambile ne: “Wêwè mulombe nî ncinyi nî ncinyi mu Dîna Dyanyi, necyenjiibwe.” Mpindyewu, ncivwa mwa kulomba bwalu ebu to, Mukalenge, bu mêmè nciyi mwele meeji ne nebwenjiibwe. Nunku mvwa—mvwa mwa kubwamba paanyi anu mu mushindu wa ne anu bu mukiiya utûtù twenzenza. Kadi ndi mbalombela bôbò, ne meeji aanyi matooke ônsò. Ndi mbalombela, mwitabuuje ne Wêwè neufile byûdi Wêwè mulaye.

<sup>153</sup> Nenku mpindyewu ndi mbumusha ku ciinà cya mâyi aci diloolo edi. Ndi mbumusha mwaba uvwabo bânwa awu, kudibo kabayi basankishiibwe aku; mbafila ku ewu Mpokolo. Ne ngenza nunku mu Dîna dya Yesu Kilisto.

<sup>154</sup> Bakaadi Beebe Wêwè, Mukalenge. Enza biikale banwa kûdî Wêwè, Mâyî adi ne mwoyi, Mpokolo wa Mâyî adi ne mwoyi. Mu Dîna dya Yesu, mmûndî ndomba emu. Amen. Bifilaaku, Mukalenge.

Kaa, musulu awu ngwà mushinga mukole  
 Udi umvwija mêmè mutooke bu nêjè;  
 Kakwena mpokolo mukwabo ûndî mumanye,  
 Cintu nansha cimwe to pa kuumusha Mashi a  
 Yesu.

Ncinyi cidî mwa kusukula mpekaatu wanyi?  
 Cintu nansha cimwe to anu Mashi a Yesu;  
 Ncinyi cidî mwa kungalujulula?  
 Cintu nansha cimwe to anu Mashi a Yesu.  
 Kaa, . . .

Yesu, ondopa aba, Mukalenge! Enzaku bwalu ebu, Mukalenge, mu Dîna dya Yesu. Ndi ndomba, Nzambi, bwa Wêwè. . . ? . . . Wêwè udi mumanye bintu byônsò.

Kakwena mpokolo mukwabo ûndi mumanye,  
Kaa, cintu nansha cimwe to anu Mashi a . . .

155 Anji elaa'yibi meeji pa bwalu abu, kakwena mpokolo mukwabo ûndi mumanye to! Ncyêna mumanye cîngà cintu to pa kuumusha Yêyè. Ncyêna njinga kumanya cîngà cintu to pa kuumusha Yêyè. Cintu nansha cimwe to pa kuumusha Mashi a Yesu! Kaa!

Kaa, musulu awu ngwà mushinga mukole  
Ûdi umvwija mêmè mutooke bu nêjè;  
Kakwena mpokolo mukwabo ûndi mumanye,  
Kaa, cintu nansha cimwe to anu Mashi a Yesu.

156 Patudi tuwimbulula apa, tulabulanganaayi ku cyanza muntu ne muntu. Nudi banangangane muntu ne mukwende anyi? Kudiku muntu muneemu emu udi bwalu ne muntu mukwabo anyi? Piikalayeku, ndààku ukabulongolola. Kî mmwômò anyi? Katuumuku mwaba ewu mushindu awu to. Nwamonu anyi? Pawikala bwalu ne muntu, ndààku ukabulongolola, anu mpindyewu mene. Mpindyewu mene ngwebe mpunga bwa kuya kudiye, kwamba ne: “Mwaneetu wa balume, mwaneetu wa bakaji, mvwa mukwambe bwalu, mvwa mwele meeji kampanda. Ncivwa njinga kwamba nanku to. Mfwileku luse.” Nwamonu's, ke mushindu wa kucyenza ngawu. Twikalaayi ne Mpokolo anu munkanci mwetu menemene, dîbà dyônsò. Nwamonu anyi?

Kakwena mpokolo mukwabo ûndi mumanye,  
Cintu nansha cimwe to anu Mashi a Yesu.

Kaa, musulu awu ngwà mushinga mukole  
Ûdi umvwija mêmè mutooke bu nêjè;  
Kaa, kakwena mpokolo mukwabo ûndi  
mumanye,  
Cintu nansha cimwe to anu Mashi a Yesu.

157 Kaa, Yêyè kêna ukemesha anyi? Kakwena mpokolo mukwabo to! Katwena baswe kupya twîshî twa bintu bikwabo to. Tukaadi batapuluke, bashiye maalu a pa buloba paanyima. Katucyena baswe kabidi matungulu a ayî ne biinà bya mâyî byelè mitanta bya Ejipitu to. Tudi mu lwendu ne Mukalenge Yesu, Lubwebwe lutuuta alu, amen, biikale tudya Manà a ku Dyulu, ne tunwa; tudya Cyakudya cya banjelo, ne tunwa ku Lubwebwe. Amen!

Kamwena mpokolo mukwabo ûndi mumanye,  
Cintu nansha cimwe to anu Mashi a Yesu.

Mpindyewu twinyikaayi mitu yetu.

158 Tudi tulomba bwa Nzambi abeneshe muntu ne muntu wa kunudi ne mabenesha mabanjike, bwa ngàsà ne luse Byende biikale neenu mu lumingu lwônsò lulwalwa elu. Ne bu bwalu kampanda ne cya kwenzeka, byenze ne bu umwe wenu mwa kwongoloka kuya dyamwamwa dya cilàmbà cikudika

mpindyewu, nwavulukaayi ne mmêbà makesee cyanaana a tulu ne diikisha too ne patwasangila. Vulukaayi, ne: “Aba badi ne mwoyi ne badi bashaale kabaakupangisha aba biikala balaale tulù to, bwalu Mpungi wa Nzambi, Mpungi wa ndekeelu awu. . .” Mwisambombo wáfumu ku didila. Nenku Mpungi wa ndekeelu awu, bu mudi Citampi cya ndekeelu, neikale Dilwa dya Mukalenge. “Neadile, ne bafwe mu Kilisto nebabiike dyambedi.” Mbiikishe anu cyanaana too ne pa diine dîbà adi.

<sup>159</sup> Nenku bu wêwè mwa kutapika, wavuluka ne:

Angata Dîna dya Yesu wëndè naadi,  
 Bu ngabu ku buteyi bwônsò;  
 Ne paakunyungulukila mateeta,  
 Eyela anu Dîna dya cijila adi mu disambila.  
 (Démons neyinyeeme.)

<sup>160</sup> Vulukaayi anu ne, tudi batekemene bwa kusangila neenu mwaba ewu mu dyalumingu dilwalwa edi mu dinda. Nulwayi ne babeedi ne bantu badi mu ntatu. Nêngikalè nnusambidila. Kadi nwânsambidilaayiku paanyi. Nenücyenzè anyi? Ambaayi ne: “Amen.” [Disangisha didi dyamba ne: “Amen.”—Muf.] Mêmè nënnüsambidilè, bwa Nzambi anubeneshe.

. . . Dîna adi mu disambila.

Dîna dya mushinga, Dîna dya mushinga, Eyi  
 dya bupole be!  
 Ditekemena dya buloba ne disanka dya Dyulu;  
 Dîna dya mushinga, Eyi dya bupole be!  
 Ditekemena dya buloba ne disanka dya Dyulu.

Twinamina Dîna dya Yesu,  
 Tupona mikookwela ku makàsà Ende,  
 Mfumu wa bamfumu mu Dyulu netuMwase  
 cifulu cya butumbi,  
 Pajjika lwendu lwetu.

Dîna dya mushinga, Dîna dya mushinga (kî  
 ndya bupole ne dya mushinga anyi?)  
 Ditekemena dya buloba ne disanka dya Dyulu;  
 Dîna dya mushinga, Dîna dya mushinga, Eyi  
 dya bupole be!  
 Ditekemena dya buloba ne disanka dya Dyulu.

<sup>161</sup> Misangu yônsò bitu anu bikole be bwa kunushiya. Nansha mûndi mumanye ne nudi bafwe ne luuya, kadi kudi anu cintu kampanda cya. . . Tuyaayi tûng, cituminyi cikwabo cimwe cyanaana cya cintu kampanda, nudi baswe kucyenza anyi? [Disangisha didi dyamba ne: “Amen.”—Muf.] Nudi baswe kucyenza anyi? *Mwonji Ûdi Ûswikakajà Ûbeneshiibwè*, mwaneetu wa bakaji. Mbanganyi badi bamanye musambu wa kale awu? Tuvwa ne ciibidilu cya kuwimba, kukaadi bidimu.



<sup>162</sup> Nenku mwya ndyambidila, diloolo edi ne, “byanza bibidi, pa nkama, bikaadi bishaale,” patuvwa ne ciibidilu cya kwimba mwine musambu awu mu tabernacle, ne biikale bakwatangane ku byanza. *Mwonji Udi Uswikakaja Ubeneshiibwè*. Nkaadi mujiike bààbûngì baa kudibo, anu apa mu nkita emu. Mbindile. Nèmbàmònè cyakabidi. Ntu mbamona, ku musangu ne ku musangu, mu cikeena-kumona, pântù ntangila dyamwamwa dya cilàmà cikudika. Badiku.

Twinyikaayi mitu yetu mpindyewu patudi twimba apa.

Mwonji udi uswikakaja myoyi yetu  
 Mu dinanga dya bwena Kilisto ubeneshiibwe;  
 Dyumvwangana . . .  
 Ndifwanangane ne dya ku Dyulu.  
 Patwikala . . .

Mpindyewu olola cyanza ukwate cyanza cya muntu kampanda.

. . .-tapuluka,

Mpindyewu inyika mutu webe.

Bidi bitùsaamisha mwoyi wa munda;  
 Kadi netwikale anu baswikakane mu myoyi,  
 Ne ditekemena dya kusangila kabibi.

<sup>163</sup> Ne mitu yetu miinyika. Ndi mpingajila mpaasata bulombodi bwa disangisha mpindyewu, bwa atangalaje . . .



*BIINÀ BYÀ MĀYÌ BYELÈ MITANTA* LUA64-0726E

(Broken Cisterns)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, dya 26 ngondo wa mwandamutekete, 1964, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyî wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)